

Xojon-la San Juan kjoa xi tsako-la Jesucristo

Kjoa xi kijtsee ko 'en xi kii'nchré San Juan

¹ Jñà kjoa koi xi kitjoé-la Jesucristo nga Nainá kitsjaà-la mé-ne nga kokò-la xita chi'nda-la jñà kjoa xi ta nitoón okoma. Jesucristo kisikasén àkjale-la nga tsako-la kjoa koi Juan xi chi'nda-la ma. ² Ko jè Juan tíchja kixi-né [k'e nga kiskii] ngats'ii kjoa xi kijtsee ko xi kii'nchré koni s'in nga jè Jesucristo kii'chja kixi-la jñà 'en xi kitsjaà-la Nainá.

³ Mé tà ndaà-la jè xita xi bíxkejii xojon koa jñà xi 'nchré 'en-la Nainá xi tít'aà xojon jè, jñà kjoa xi sa kítasòn; tíkoáá mé ta ndaà-la jè xita xi síkitasòn koni tsò xojon jè, nga jè nàchrjein, jyeé nchrobá machraña.

Kó tsò Juan nga síhixat'aà nga itoò naxandá-la Cristo xi títsajna ján i'nde Asia

⁴ 'An xi 'mì-na Juan, tíshixat'aà-nò, jñò xi naxandá-la Cristo maà xi itoò i'nde títsajnaà ján nangui Asia. Jè kàtatsjá-nò kjondaà ko kjoa'nchán jè Nainá xi tíjna, jè xi tsibìjna ko jè xi kjoíi ijngoò k'a-ne; k'oa tí's'in kàtatsjá-nò kjondaà ko kjoa'nchán jñà inima xi itoò ma-ne xi títsajna nguixkon jè xi tíjnasòn íxile nga tíhotíxoma; ⁵ ko jè Jesucristo k'oa tí's'in kàtatsjá-nò kjondaà ko kjoa'nchán. Jè Cristo, jè xi nguì 'en kixi tsjá, xi kí'ndí tjòn xi jaáya-la it'aà ts'e kjoa biyaa ko jè xi otíxoma-la jñà xita sko-la xi tjin i it'aà nangui.

Cristo matsjakeè-ná nga kisìtsjeè jé-ná it'aà ts'e jní-là xi tsibíxteèn. ⁶ Cristo k'oaá s'ín kisikítsajna-ná nga xítà ítjòn komaá kò nò'miì komaá nga jñá s'ixá-lá Nainá xi Nà'èn-là ma Jesucristo. Jeya kàtìjna; jè kàtatíxoma kjit'aà, nítà mé nàchrjein-ne, nítà mé nó-ne. K'oaas'ín kàtama.

⁷ ¡Chítsejèn-là! Jè Cristo jyeé kjomeé f'ìi nga tínychrobájìin ifi. Ngats'ìi xítà, xkoón skoe-ne. Jñà xítà xi kisik'en Cristo tìkooá skoe-ne. Ngats'ìi xítà naxandá xi t'jín i it'aà nangui skíndáyakeè-né nga 'on koma-là it'aà ts'e. Jon, k'oaá s'ín koma.

⁸ “An-ná xi tìjna ítjoàn skanda tàts'en-là kjoa kò nga skanda fehet'aà-ne; 'an-ná xi tìjnaa, xi tsibi-jnaa, kò xi kjoii ijngoò k'a; tajngoó-ná xi tse nga'ño t'jín-na”, tsò Nà'èn-ná xi Nainá.

Kjoa xi tsakó-là Nainá Juan it'aà ts'e Cristo

⁹ An-ná xi mì-na Juan, xi 'ndsè xan-nò it'aà ts'e Cristo. Nga yaá titsajnakooá Cristo ngàsòn titsanìkjiaán kjo'in, kò ngàsòn ya nokjoà-ná ñánda tíhotíxoma Nainá kò ngàsòn tíchíkjoako-ná ngats'ìi kjoa. 'An nga 'én-là Nainá tíchjàya kò tìbenojmí kixi-là xítà it'aà ts'e Cristo, k'oaá komà-ne ján kinìkasén-na ya nangui jìin-ndá ñánda 'mì Patmos.

¹⁰ Jngoò nàchrjein-là Nainá, 'an, nga ya tìjnakooa Inìma Tsjeè-là, ya ítjòn índsiàn k'i'nchrè jngoò-là 'én xi 'ño kùichja koni jngoò chrjo xi 'ño jane,

¹¹ kitsò-na:

—'An-ná xi tìjna ítjoàn kò xi fehet'aà-ne. Chjoí jngoò xojòn, tít'eii kjoa xi tì'yi; ikjoàn tìkasén-là naxandá-na xi itoò j'nde títsajna ján nangui Asia, jñà naxandá xi 'mì Éfeso, Esmirna, Pérgamo, Tiatira, Sardis, Filadelfia kò Laodicea.

12 K'eé kisikátjifaya nga mejèn-na skoeè yá xita xi tíchja-na; kijtseè itoò candelero xi nguì kichà oro xi ma tya asitì. 13 Ya jngoò osen-la ñánda jncha candelero xi itoò ma-ne sijnajin xi okji koni kji ki'ndí-la xita. Jngoò nikje kinakjá xi ndojò kji. Bijchó skanda itjòn ndsokò. Tíkjá jngoò na'ño payo ya isòn inima-la xi nguì oro. 14 Tsja sko, k'oaá kjoàn koni kjoàn tsja chroba-la orrè, koni kjoàn 'nchán kjoàn. Xkon, k'oaá s'in tsejèn koni tsà títi ni'in. 15 Ndsokò k'oaá kjoàn koni kichà sinè xi 'ño ndaà ote k'e nga jye sijnin ni'in. Jè jta-la, k'oaá s'in na'yà-la koni ñánda 'ño je nandá túbixòjen-tjòn. 16 Jè tsja kixi, itoò ni'ño tjíya. Jè tso'ba jngoò kichà ndojò bitjo xi 'ño yijò kji ingajò ngobà. Isén-la k'oaá kji koni kji ts'oi k'e nga 'ño matsjè ndobá, 'ño ote kji.

17 K'e nga kijtseè, kiskaànguia ingui ndsokò koni jngoò mik'en. Ikjoàn jè tsakájnason-na tsja kixi, kitsò-na:

—Kì tsakjoòn-jèn, 'an-ná xi tijná itjoàn kò xi fehet'aà-ne, 18 kò tijnakon-ná. Tsakátijna k'en-ná tanga i'nde i tijnakon-ná nita mé nachrjein, nita mé nó-ne. 'An tjíya ndsaa ibi ts'e kjoabiyáa ya i'nde-la mik'en. [Tj'indeé-na nga skix'aa kò kichjoà nga sijkjaáya-la.] 19 Chjí jña kjoa xi jye kà'yi kò kjoa xi tíma nachrjein i'nde i kjoa xi koma nga koma iskan. 20 Kíí tsò-ne jè kjoa'ma xi kà'yi ts'e ni'ño xi itoò ma-ne xi tjíya ndsaa kixi kò xi itoò candelero xi nguì kichà oro. Jña ni'ño xi itoò ma, jña àkjale-la naxandá-na xi itoò i'nde títsajna; kò jña candelero xi itoò ma-ne, jña-né xi naxandá-na xi itoò i'nde títsajna.

2

Kjoa xi kisinè-la naxandá-la Cristo ján Éfeso

¹ 'Chjí jngoò-la xojon jè àkjale-la naxandá-na xi títjna ján Éfeso: “Kíí tsò jè xi itoò ní'ño títjya tsja kixi, jè xi tsóhojiin osen-la jña candelero xi itoò ma-ne xi nguì kichá oro, tsò-né: ² Tibe-ná xá-nò, 'ño títšanìxá kò nga mìkìi bijta-nò. Tíkooá tibe-ná nga mì tì kii chíkjoako-nò jña xitá xi ch'o s'ín. Tíkooá tibe-ná nga jyeé kichìt'aà jña xitá xi tsò-la yijo-la nga Cristo tsibíxáya-la, tanga mìtsà kixi kjoa. Jyeé kí'yaà nga xitá ndiso-né. ³ Kjit'aà nachrjein 'nó tse kjo'in títšanìkjoón, kò 'ño títšanìxá xi kjoa ts'an. Mìkìi bijta-nò. ⁴ Tanga tjin jngoò-nò kjoa xi ch'o tjin xi mìkìi sasén-na nga mì tì k'ooá s'ín tjin-nò kjo'tjòcha koni nga sa ítjòn. ⁵ Jñò, tìkítseèn kó kí'nè nga sa ítjòn k'e nga kj'eè jé bixòjñoò. Tìkájno jé-nò. Ìjngoò k'a Nainá tanguít'aà-là. K'ooá s'ín t'een koni kí'nè nga sa ítjòn. Tsà majìn-nò, 'an kjián nga tsjaà-nò kjo'in kò kjoáxìn-nò ní'ín candelero-nò ya ì'nde ñánda síjna. ⁶ Tanga tjin kjoa xi ndaà títša'nè nga majticha kjoa xi s'ín jña xitá nicolaítas. 'An, tíkooá majtike-ná. ⁷ Ndaà tjiná'yaà koni tsò Inimá Tsjeè-la Nainá nga tíchja-la naxandá-na. Jña xi sìkijne, 'aán tsjaà-la nga skine jña toò-la jè yá xi síkijnakon-ná xi síjna ya ì'nde-la Nainá ñánda 'ño ndaà choòn.”

Kjoa xi kisinè-la naxandá-la Cristo ján Esmirna

⁸ 'Chjí jngoò-la xojon jè àkjale-la naxandá-na xi títjna ján Esmirna: “Kíí tsò jè xi tsibljna ítjòn kò xi fehet'aà-ne, jè xi k'en kò jaáya-la, tsò-né: ⁹ 'An be-ná xá-nò kò kjo'in xi títšanìkjoón kò nga xitá

ima 'mì-nò (tanga it'aà ts'e Nainá, xita nchiná-nó jñò). Be-ná nga ch'oo chjajno-nò jñà xita xi tsò nga xita judío-né tanga mitsà kixi kjoa nga xita judío. Jñà xita koi, yaá chja-ne ya ni'ya ñánda maxkóya xita-la xita neí. ¹⁰ Kì tsakjoòn-jèn jè kjo'in xi sikjioón, jè xita neí skínis'en-nò ndayá mé-ne nga skót'aà-nò kjoa xi mokjeín-nò; te nachrjein s'e-nò kjo'in. 'Nó t'è-là takòn kóni skanda k'e nga kiyá. Kò 'aán tsjaà-nò jè kjoabinachon xi mìkii fehet'aà koni jngoò corona. ¹¹ Ndaà tiná'yaà koni tsò Inima Tsjeè-la Nainá nga tíchja-la naxandá-na. Jñà xi sükijne, nímé kjoa xi komat'in it'aà ts'e kjoabiyaà xi ma-ne jò k'a.”

Kjoa xi kisinè-la naxandá-la Cristo ján Pérgamo

¹² 'Chí jngoò-la xojon jè àkjale-la naxandá-na xi tíjna ján Pérgamo: “Kíí tsò jè xi tjin-la kichá ndojò xi yijò kji nga ingajò ngobà, tsò-né: ¹³ 'An tibe-ná xá-nò, tibe-ná nga yaá titsajnaà ñánda tíhotíxoma xita neí. Tanga be-ná nga kixi titsajnaà; mìkii nìjchàajioòn it'aà ts'an. Tikoá be-ná nga mìkii bì'ma koni s'in mokjeín-nò it'aà ts'an, nas'in k'e nga k'en Antipas, xita xi kixi bénojmi xi it'aà ts'an; nga yaá k'en jjiìn naxandá-nò ya ñánda síxá xita neí. ¹⁴ Tanga tjin i'nga kjoa xi mìkii sasén-na nga ch'o titsa'nè, nga yaá titsajnajiìn-nò xita xi mokjeín-la koni s'in tsakóya Balaam kjòtseé nga chinchá'a Balac nga mejèn-la kohótsji jé jñà xita Israél nga kàtakine tsojmi xi xkósòn kisinchaàt'aà-la; tikoá kàtas'in kjoachijngui. ¹⁵ Tikoáá titsajnajiìn i'nga-nò xita xi mokjeín-la koni s'in okóya jñá xita nicolaítas. Jñà xita koi, 'an majtike-ná. ¹⁶ K'oaá ma-ne tikájno jé-nò, kì tì jé binchaàtsji-nò. Tsà mì

k'oa s'een, nitoón kjián nga skaàn-koaa xita koi. Jè sikjeén kichá ndojò xi bitjo-ne ndsoba. ¹⁷ Ndaà tiná'yaà koni tsò Inima Tsjeè-la Nainá nga tichja-la naxandá-na. Jñà xi sikkijne, 'aán tsjaà-la tsojmì xi skine xi 'mì maná xi 'an tji'ma-na; tikoa tsjaà jngoò-la ndí ndajo jtobá xi chroba kji; yaá tji't'aa 'ín xitse xi mì yá beèxkon; tà jè skoexkon xi tjoé-la.”

Kjoa xi kisinè-la naxandá-la Cristo ján Tiatira

¹⁸ 'Chjí jngoò-la xojon jè àkjale-la naxandá-na xi tíjna ján Tiatira: “Kíí tsò jè Kí'ndí-la Nainá xi kokjoàn xkon koni ni'ín, kò jñà ndsoko, k'oaá kjoàn koni kichá sinè xi 'mì bronze xi 'ñó ndaà kjòchrja'i: ¹⁹ 'An, be-ná xá-nò kò kjoatjòcha-nò, kò kós'ín nga mokjeiin-nò koa kós'ín titsanixá nga tíchíkjoako-nò xá xi titsa'nè. Be-ná nga jè naxrjein i'ndeji isaá ndaà titsanixá mì k'oa-ne koni nga sa ítjòn. ²⁰ Tanga tjín i'nga kjoa xi mìkil sasén-na nga ch'o titsa'nè, nga bìi'nde-là jè chjoón Jezabel xi tsò-la yijo-la nga ma-la bénojmiya mé kjoa xi iskan koma nga konachan kò okóya-la xita chí'nda-na mé-ne nga kjoachijngui kátas'ín-ne tikoa kàtakine tsojmì xi xkósòn sinchát'aà-la. ²¹ 'Aán titsja isa-la naxrjein nga kátasíkájno jé-la nga mì tí jé kohótsji-ne, tanga majin-la tsjeiin takòn kjoachijngui xi s'ín. ²² Tanga 'aán tsja-la ch'in nga 'ñó tse kjo'in sikkjeiin kò jñà xita xi ngásòn s'ín kjoachijngui, tsà majin-la nga sikkájno jé-la nga mì tí jé kohótsji-ne. ²³ Jñà xita xi ya fit'aà-la, jngoò k'aá s'ik'en. Kò ngats'ii xita naxandá-la Cristo skoe-né nga 'an-ná xi be kó tsò kjohítsjeen-la kò inima-la jñà xita. Jñò, nga jngoò ijngoò, k'oaá s'ín tsja-nò kjo'in koni tjín kjoa xi titsa'nè. ²⁴ Tanga

jñò kò xità xi l'nga xi títsajna Tiatira xi mìkìl kota'yà kjòhítsjeèn xi mìkìl ndaà tjín, tìkoà kj'eè kii beè jè xi tsò-la jñà xità koi kjoatjí'ma-la xità nejí. Jñò, k'oaá xan-nò mìtsà tì mé kjoa sùjé-isa-nò. ²⁵ Tanga jñò, koni s'ín tjín jè kjòhítsjeèn ndaà xi títsa'nè, k'oaá s'ín t'een skanda k'e nga 'an kjoiaa ìjngoò k'a. ²⁶ Jñà xi sùikijne-la kjoa ts'e jé tìkoà sùikitasòn xá-na koni s'ín mejèn-na skanda k'e nga kjoehet'aà nachrjein, 'aán tsjaà-la xá nga jñà kotìxoma-la ngats'ùì naxandá xi tjín isò'nde. ²⁷ Jñà xità xi kotìxoma, nguì koó kicha kotìxoma-ne. K'oaá s'ín sùixkoaya koni tìjí ni'nde. ²⁸ Jè kjotìxoma jè, tìjé-ne xi kitsjaà-na Na'èn-na. 'An tìkoá tsjaà-la jè ni'ño tse xi bitjokàtji k'e nga tajñòya. ²⁹ Ndaà tìná'yaà koni tsò Inìma Tsjeè-la Nainá nga tíchja-la naxandá-na.”

3

Kjoa xi kisinè-la naxandá-la Cristo ján Sardis

¹ 'Chjí jngoò-la xojon jè àkjale-la naxandá-na xi tìjna ján Sardis: “Kíí tsò jè xi itoò inìma-la Nainá tjín-la, kò itoò ma ni'ño-la: 'An be-ná kjoa xi títsa'nè; k'oaá s'ín 'ya-nò nga títsajnakon-nó tanga xi nguì kixì kjoa, títsajnak'en-nó. ² Tìkjaáya-là yijo-nò, tjiì-là nga'ño kjoa xi jye mejèn tíchja. 'An, kj'eè kii be tsà ndaà títsa'nè nga nguixkon Nainá. ³ Tìkítsjeèn kjòhítsjeèn xi kitjoé-nò kò xi jye ndaà kina'yà; k'oas'ín tìkitasòn. Tìkájno jé-nò, kì tì jé binchaàtsji-nò. Tsà mìkìl sùikindaa yijo-nò k'oaá s'ín kjoikjaá-nò koni s'ín xità chijé k'e nga mìkìl títsajnandaà mé hora-ne nga kjoí. ⁴ Tanga tjín chiba-nò xità ya Sardis xi kj'eè mé jé ótsji, yaá taña

kinchimako-na nga chroba kjoàn nikje xi kókjá nga k'oaá s'ín ok'ín-la. ⁵ Jñà xità xi siikijne-la kjoa ts'e jé, nikje chrobaá kjoàn xi kókjá; mìkiì sìchàaya 'ín-la ya it'aà xojon ts'e kjoabinachon. Kò k'oaá xán nga nguixkon Nainá xi Nà'èn-na ma kò nguixkon àkjale-la nga xità ts'an-ná. ⁶ Ndaà tiná'yaà koni tsò Inima Tsjeè-la Nainá nga tíchja-la naxandá-na.”

Kjoa xi kisinè-la naxandá-la Cristo ján Filadelfia

⁷ 'Chjí jngoò-la xojon jè àkjale-la naxandá-na xi tíjna ján Filadelfia: “K'oaá tsò jè xi nguì xità tsjeè kò xi nguì jè sobà xi xità kixì, jè xi tjín-la ibi-la xitaxá ítòn xi ki'mì David, jè xi ma-la kix'a xòhotjoa-la ngajmù kò nijngoò-isa xi tjí'nde-la nga kìichjoàjto; kò k'e nga jè kìichjoàjto, nijngoò-isa xi tjí'nde-la nga skíx'ajto: ⁸ 'An be yije-ná xá-nò; chítsejèn-là, kisíkijna osen jngoò-nò xotjoa xi tix'á, xi nijngoò tjí'nde-la nga kìichjoàjto. Nga nas'ín tà chiba nga'ńó tjín-nò tanga titsanìkitasòn-nó koni tsò 'én-na; mìkiì bitsajna'ma it'aà ts'an. ⁹ Tjín jngoò jtín xità xi ya chja-ne ya ni'ya ñánda maxkóya xità-la xità nejí; xità ndiso-né nga tsò nga xità judío, tanga mìtsà kixì kjoa. Xità koi, 'aán kichjà-la nga kàtjanchrobá mé-ne nga kìnchaxkó'nchit'aà-nò; k'oaá s'ín skoe-ne nga 'an, 'ńó matsjake-nò. ¹⁰ Koií kjoa-la nga titsanìkitasòn koni tsò 'én xi kitsjaà-nò nga kìichìkjoako kjit'aà-nò nità mé kjoa-ne, k'oaá ma-ne, 'aán kósìko-nò jè nachrjein xi jye nchrobá machraña nga s'e-la kjo'in nga tíjtsa isò'nde k'e nga chít'aà yije xità xi ì títsajna it'aà nangui. ¹¹ Kjoji nitoón ìjngoò k'a. Ndaà tikinda ngats'iì kjondaà xi tjín-nò koni s'ín mokjeiín-nò mé-ne nga mì yá xi kjoaá'an-nò xi jñò jye

kinikijne. ¹² Jñà xi s̄ikijne-la ngats'ìi kjoa ch'o xi t̄jín isò'nde, 'aán tsja jngoò-la ì'nde ñánda kítsajna nga kjit'aà n̄achrjein k'oaá ngaya-la koni jngoò chrjó xi kos̄ingui'ñó-la ya ni'ya tsjeè-la Nainá nga sk̄ijnoa 'ín-la xi Nainá xan-la ko 'ín-la naxandá-la Nainá, xi Jerusalén x̄itse 'mì xi k̄j̄inchrobà-ne ngajm̄i ñánda t̄jna Nainá, t̄ikoā sk̄ijnoa 'ín x̄itse xi ts'an. ¹³ Ndaà t̄iná'yaà koni tsò In̄imā Tsjeè-la Nainá nga t̄ichja-la naxandá-na.”

Kjoa xi kisinè-la naxandá-la Cristo ján Laodicea

¹⁴ 'Chj̄i jngoò-la xojon jè àkjale-la naxandá-na xi t̄jna ján Laodicea: “Kíí tsò jè xi s̄j̄ngoò yije 'én-la Nainá, jè xi nguì 'én kix̄i tsjá, jè xi nguì jè sobà kjoakix̄i, jè xi tsibíts'ia ngats'ìi xi tsibindaà Nainá. K'oaá tsò: ¹⁵ 'An, be-ná mé kjoa xi t̄itsa'nè; m̄itsà 'nchán t̄itsajnaà n̄i m̄itsà tsjè t̄itsajnaà nga m̄itsà kondra t̄itsajnakō-ná ko m̄itsà ndaà onguít'aà-ná. Ndaà-là t̄jín tsà nguì ndaà onguít'aà-ná ko tsà majin tsà nguì kondra t̄itsajnakō-ná. ¹⁶ Tanga jñò, nga isò-nò, m̄itsà 'nchán t̄itsajnaà n̄i m̄itsà tsjè t̄itsajnaà, k'oaá ma-ne nga ndsoba sk̄ihisò-na. ¹⁷ Jñò k'oaá bixón: X̄it̄a nchiná-nájen; ndaà t̄itsajna-jen; n̄imé chijat'aà-najen. Tanga mìk̄i 'ya nga 'íin t̄itsajnaà; n̄imé xi t̄jín-nò; x̄it̄a ima-nò; mìk̄i tsejèn-nò; laká t̄itsjoè. ¹⁸ 'An, k'oaá xan-nò, 'aán t̄indát'aà-ná ton oro xi ni'ín kjòtsjeè-ne mé-ne nga x̄it̄a nchiná kōma-nò. T̄ikoā 'aán t̄indát'aà-ná nikje tsjeè xi chroba kjoàn mé-ne nga mì kosobà-nò nga t̄itsajna laká yijo-nò. T̄ikoā t̄inguioð x̄k̄i colirio jñà xkoòn mé-ne nga ndaà kotsejèn-nò. ¹⁹ Ngats'ìi x̄it̄a xi 'an matsjake, ot̄ikō-ná t̄ikoā tsjaà-la kjo'in. Mochjeén-né nga tj̄i-là nga'ñó yijo-nò; t̄ikájno

jé-nò, kì tì jé binchaàtsji-nò. ²⁰ 'An, yaá tìjnajtoa xotjoa ni'ya nga tìchjà; tsà tìjn i'nga xi kji'nchré-na, koa tsà skíx'a xotjoa ni'ya-la, komaá kjoahas'en nga kókjen-koaa, tìkoa jè, kòkjen-ko-na. ²¹ Jñà xi sikkijne tsjaà'nde-la nga ya kítsajnat'aà-na ñánda tìjna íxile ts'e kjotíxoma-na koni s'ín 'an jye kisikijne nga yaá tìjnat'aà-la Na'èn-na ñánda tìjna íxile ts'e kjotíxoma-la. ²² Ndaà tìná'yaá koni tsò Inima Tsjeè-la Nainá nga tíchja-la naxandá-na.”

4

Kós'in yaxkón Nainá ján ngajmì

¹ Xi jye komà iskan, kiskoòtsejèn ján i'ngaá; kìjtseè ngajmì nga tìx'á jngoò xotjoa ko jè jta xi k'i'nchré ítjòn-la xi koa tsò koni chrjo trompeta, kitsò-na:

—Nchrobá mijìn ijndé; kokoò-lè kjoa xi koma k'e nga jye komà yije kjoa xi tíma i'ndeì.

² Tà nìtoón j'ìi kanè jngoò k'a-na jè nga'ñó-la Inima Tsjeè-la Nainá; kìjtseè jngoaa íxile xi tìjna ngajmì ñánda tísatíxoma. Jé íxile jè, tìjna jngoò xi ya tìjnasòn. ³ Jè xi tìjnasòn íxile nga tíhotíxoma, k'oaá kji ote tsejèn koni kji ndajo chí xi 'mì jaspe, o koni kji ndajo chí xi 'mì cornalina. Ya indìi-la íxile síjrandìi jngoò-la ijñe xi okji ote tsejèn koni kji ndajo chí xi 'mì esmeralda. ⁴ Tìyaá-ne nga jngoò itjandìi-la ñánda tìjna xi tìjnasòn íxile nga tíhotíxoma, kaàn ñijòn íxile 'ncha isa ñánda tísatíxoma, tìkoa kaàn ñijòn xita jchínga títsajnasòn xi nguì chroba kjoàn nikje xi kikjá; saà corona kichá oro tìj'a sko. ⁵ Ya ñánda tìjna xi tìjnasòn íxile nga tíhotíxoma, bitjo ni'ín ch'òn, ko ts'ìin ch'òn, tìkoa na'yà-la jta xi

chja; itoò ni'ín xi síhiseèn títi ya nguixkòn íxile; jñà ni'ín, jñà inima tsjeè-la Nainá xi itoò ma-ne. ⁶ Ya nguixkòn jè xi tíjnasòn íxile nga tíhotíxoma, kijina jngoò ndáchikon xi koni kji chĩtsín kji xi 'ñó ote.

Ya it'aà íxile kò ya indii-la, ñijòn ma xi títsajnakon; kóhokji ijton íts'in kò ya indso'ba, xki xi ján tjit'aà xkòn. ⁷ Jè xi tíjna ítjòn jñà xi títsajnakon, k'oaá kji koni kjoàn xa. Xi ma-ne jò, koni kji nchraja ki'ndí kji. Xi ma-ne jàn, isén-la xitaá tjín-la. Xi ma-ne ñijòn, k'oaá kji koni kji ja xi tsó'bajiìn isén. ⁸ Jñà xi ñijòn ma-ne xi títsajnakon nga jngoò ìjngoò, joòn jngaá tjín-la. 'Nó kjín ma-ne xkòn xi tjín nga jngoò itjandii-la kò iya-la. Mikii síkjáya kò nachrjein kò nitjen nga tsò:

Tsjeè-né, tsjeè-né, tsjeè-né jè Na'èn-ná xi Nainá,
xi ta jè tajngoó xi 'ñó tse nga'ño tjín-la,
jè xi tsibijna, jè xi tíjna kò jè xi kjoii ìjngoò k'a-ne.

⁹ Jñà xi títsajnakon nchitsjá-la kjoajeya, nchitsjá-la kjondaà, kò nchibeèxkón jè xi tíjnasòn íxile jè xi tíjnakon nita kjé-ne. K'e k'oa nchis'ín, ¹⁰ jñá xita jchínga xi kaàn ñijòn ma-ne bincha-xkó'nchi-ñiat'aà-la jè xi tíjnasòn íxile tikoá beèxkón-né jè xi tíjnakon nita mé nachrjein-ne. Síkatsjoò corona-la ya nguixkòn jè xi tíjnasòn íxile nga tsò:

¹¹ Na'èn, ok'ín-lè nga ji tjoé-lè kjoajeya, nga jchaxkón-lè,
nga tsiji yije-né nga'ño xi tjín,
nga ji tsibindii ngats'ii tsojmi xi tjín,
nga k'oaá s'ín kjòmejèn-lè nga tjín yije tsojmi
kò nga kisindaà kóhotjín xi tjín.

5

Xojon xi maxkóya ko jè Orrè

¹ 'An, kùjtseè jè xi tíjnasòn íxile nga tíhotíxoma, kjinaya tsja kixi jngoò xojon xi kjixkóya xi kitjei-jno iya-la ko ngatsejèn-la ko itoò k'a tji'ño ñánda jncha-la sello nga jngoò ijngoò k'a. ² Kùjtseè jngoàà àkjale xi tse nga'ño tjín-la, xi 'ño kùichja nga kitsò:

—Yá xi ok'in-la nga skíx'a jè xojon koa komà-la kjoaáxin jña sello xi jncha-la.

³ Tanga nijá kisakò xi komà-la nga kiskíx'a jè xojon, ni mìkii ma kotsejèn-la nga kot'aà kó tsò 'én xi tji't'aà; nijngoò kisakò ján ngajmii, nijngoò kisakò it'aà nangui, koa nijngoò kisakò ingui nangui. ⁴ 'An, 'ño kiskindàya nga ko ndáxkoaàn k'e nga kùjtseè nga nijngoò kjòtsji xi ok'in-la nga kiskíx'a jè xojon nga ma kot'aà kó tsò 'én xi tji't'aà. ⁵ Jña xita jchínga xi kaàn ñijòn ma-ne, jngoò xi kitsò-na:

—Kì chihindáya-jèn. Tíjna xi 'mì: Xa-la xita naxandá Judá, xi tikoá 'mì: Tje-la xitaxá ítjòn David, nga jè xi jye kisikijne-la kondra-la. Jè xi ok'in-la nga skíjndaya jè xojon koa koma kjoaáxin sello-la xi itoò ma-ne.

⁶ K'eé kùjtseè jngoò Orrè nga síjna ya jngoò osen-la ñánda tíjna xi tíjnasòn íxile nga tíhotíxoma, ko ñánda títsajna jña xi ñijòn ma-ne xi títsajnakon, ko ñánda títsajna xita jchínga xi kaàn ñijòn ma-ne. Jè Orrè, k'oaá kji koni tsà jye k'en; itoò ma nchrajá-la tikoá itoò ma xkon; jña xkon, jña inima-la Nainá xi itoò ma-ne xi kinikasén nga tíjtsa isò'nde. ⁷ Jè Orrè, kiskoé jè xojon xi kjinaya tsja kixi jè xi tíjnasòn íxile nga tíhotíxoma. ⁸ Jè Orrè, k'e nga jye kiskoé xojon jè, jña xi ñijòn ma-ne

xi títsajnakon kò jǎ̀nà xítà jchínga xi kaàn ñijòn ma-ne chinchaxkó'nchi-ñiat'aà-la nga nguixkòn Orrè. Ngats'ìi saà ní'ño arpaá 'ya kò chítshín xi nguì oro xi tjiya chrjongó-la nainá. Jè chrjongó-la nainá jǎ̀nà xi kjoa bítsi'ba-la jǎ̀nà xítà-la Nainá. ⁹ Kiseè jngò sò xítse xi tsò:

Ok'ín-lè nga ngaji chjoí jè xojon, chjaàxìn sello-la nga jì kinik'en-lè, nga kò jní-lè tsibíchjítjì xítà xi yà itjokàjìin-ne ngats'ìi tje-la xítà xi tjín isò'nde, ngats'ìi 'én xi tjín isò'nde, ngats'ìi naxandá xi tjín, kò ngats'ìi nangui xi tjín isò'nde mé-ne nga yà kichja-ne it'aà ts'e Nainá.

¹⁰ Kò xítaxá ítjòn ki'nì kò nò'miì ki'nì nga ma sùkitasòn-la Nainá, koa jǎ̀nà kotìxoma jì it'aà nangui.

¹¹ K'e nga kiskoòtsejèn, ki'nchrè jta-la jǎ̀nà àkjale xi kjiìn jchán millón ma-ne xi nchiseè yà indii-la ñánda tíjna xi tíjnasòn íxile nga tíhotìxoma kò ya ñánda títsajna jǎ̀nà xi títsajnakon kò jǎ̀nà xítà jchínga.

¹² 'Ñó jchán nchichja nga tsò:

Jè Orrè xi kinik'en, ok'ín-la nga jchaxkón nga ts'e yije-né nga'ño xi tjín, kò kjoa nchiná kò kjoa chjine, kò jè tsjá nga'ño, ndaà kàtayaxkón, jeya kàtìjna kò 'nga kàtìjna.

¹³ Ngats'ìi xi xó kisindaà-ne xi tjín ngajmiì, xi tjín jì it'aà nangui kò yà ingui nangui, kò xi tjín jjiìn ndáchikon, ki'nchrè-la nga tsò: Jè xi tíjnasòn íxile kò Orrè, 'nga kàtìtsajna; kàtayaxkón, jeya kàtìtsajna,

kàtas'e-la nga'ñó n̄ita mé n̄achrjein-ne.

¹⁴ Jñà xi ñijòn ma-ne xi títsajnakon, kitsò:

—¡K'oas'ín kàtama!

Jñà x̄it̄a jchínga xi kaàn ñijòn ma-ne chinchaxkó'nchi-ñiat'aà-la nga jeya kisikíjna jè xi tíjnakon n̄ita mé n̄achrjein-ne.

6

Sello xi itoò ma-ne

¹ K'eé k̄ijtseè jè Orrè nga jaàxìn ítjòn jngoò sello. Ikjoàn ki'nchrè jngoò-la jñà xi ñijòn ma-ne xi títsajnakon nga kiichja. K'oaá kitsò koni ma ch'on nga one, kitsò:

—Nchroboí!

² Kiskoòtsejèn, k'eé k̄ijtseè jngoò kohòyo xi chroba kji; jè xi tíjnakjá-la kohòyo, kjinaya tsja jngoò arco xi mochjeén k'e nga tjín kjojchán; ikjoàn kitjoé jngoò-la corona xi si'a sko x̄it̄a k'e nga síkijne; kii nga jye kisikijne mé-ne nga siikijne isa-ne.

³ Jè Orrè, k'e nga jaàxìn sello xi ma-ne jò, ki'nchrè-la jè xi ma-ne jò xi títsajnakon nga kitsò:

—¡Nchroboí!

⁴ Kò ìjngoò kohòyo itjo xi inì kji; jè xi tíjnakjá-la, kitjoé jngoò-la k̄icha ndojò xi 'ñó je kji, t̄ikoa kitjoé-la nga'ñó nga kàtjaàxìn kjoa'nchán xi tjín it'aà nangui mé-ne nga kàtasík'en-ne xíkjín jñà x̄it̄a.

⁵ Jè Orrè, k'e nga jaàxìn sello xi ma-ne jàn, ki'nchrè-la jè xi ma-ne jàn xi títsajnakon nga kitsò:

—¡Nchroboí!

K'e nga kiskoòtsejèn, k̄ijtseè ìjngoò kohòyo xi jmà kji; jè xi tíjnakjá-la kohòyo, jngoò libra tjíya tsja jè xi machibaya-ne tsojmì. ⁶ Ki'nchrè jngoò-la jta ya

jngoò osen-la jñà xi ñijòn ma-ne xi títsajnakon nga kitsò:

—Nga jngoò nisoò trigo, jngoò nàchrjein chjí-la chì'nda tjín-ne. Kò nga jàn nisoò cebada, tikoáá jngoò nàchrjein chjí-la chì'nda tjín-ne. Kì tà nìkìts'ón-jen jè asitì kò vino.

⁷ Jè Orrè, k'e nga jaàxìn sello xi ma-ne ñijòn, ki'nchrè jta-la jè xi ma-ne ñijòn xi títsajnakon nga kitsò:

—jNchroboí!

⁸ Kiskoòtsejèn, kìjtseè jngoàà kohòyo xi sinè kji. Jè xi tjínakjá-la, Kjoabiyaà 'mì 'ín-la; ìjngoò tjìngui-la xi I'nde ts'e Mik'en 'mì. Kitjoé-la kjo'tìxoma nga ngats'ìi xitá xi tjín isò'nde, xi ñijòn xitá, jngoò kiyá xi kjoa ts'e kjojchán, kjoa ts'e kjinchrá, kjoa ts'e ch'in kò kjoa ts'e cho ts'en xi tjín jjiin ijñá sùik'en.

⁹ Jè Orrè, k'e nga jaàxìn sello xi ma-ne 'òn, 'an kìjtseè ya ìngui ímixa tsjeè-la Nainá títsajna jñà xitá xi kinìk'en nga koií kjoa-la 'én-la Nainá, tikoá koií kjoa-la nga kixì kitsjaà 'én-la Nainá. ¹⁰ 'Ñó nchichjá nga tsò:

—Na'èn xi jì sabà tìhotìxomai, jì xi nguì tsjeè tijni kò nguì kjokixì, skanda mé nàchrjein kíndaajìin-la nga k'oi-la kjo'in jñà xitá xi tjín ján isò'nde, jñà xi kisik'en-najen.

¹¹ K'eé kits'ìi-la nikje xi chroba kjoàn, ki'mì-la nga kàtasíkjáya chiba nàchrjein isa skanda k'e nga kojngoò jñà xi 'ndse joó it'aà ts'e Cristo xi tikoá ngàsòn xá-la Nainá kiyájìin-ne.

¹² Jè Orrè, k'e nga jaàxìn sello xi ma-ne joòn, kiskoòtsejèn nga j'ìi jngoò ch'ón xi 'ñó ts'a. Jè ts'oi, jmà kji komà koni nikje jmà, kò jè sá, inì kji komà

koni jní. ¹³ Jñà ni'ño xi t́jín ngajmii, chixòt'aà nangui koni ma jñà toò ikò xkoén nga bixòngui k'e nga 'ño 'ba tjo. ¹⁴ Jè ngajmii, k'oaá s'in kichijà koni jngoò xojon xi ma maxkóya; ngats'iì jñà nindoò kò nangui jiiin-nda xi t́jín jiiin ndáchikon, jahatjìya-la ya i'nde ñánda títsajna. ¹⁵ Jñà xitaxá ítjòn xi t́jín isò'nde, kò xitá xi 'ño ndaà yaxkon-la, kò xitá nchiná, kò xitá sko-la soldado, kò xitá xi tse nga'ño t́jín-la, kò xitá chi'nda, kò xitá xi títsajnandejí nga mìtsà nei t́jín-la, yaá tsibìtsajna'ma ñánda t́jín nguijo kò naxi xi t́jín-la nindoò. ¹⁶ Kitsò-la jñà nindoò kò jñà naxi:

—Tikatsjònè-nájen yijo-nò, tijtsa'ma-nájen mé-ne nga mìkiì skoe-najen jè xi tíjnasòn íxile nga tíhotíxoma kò tikoá kítsajna'ma-lajen kjoajti-la kò kjo'in xi tsjá jè Orrè. ¹⁷ Nga jye ijchò nachrjein-la Nainá kò Orrè nga kò kjojtì-la, 'ño tse kjo'in tsjá. ¿Yá xi koma kichìkjoako-la?

7

Jñà chi'nda-la Nainá xi t́jít'aà chiba-la

¹ Xi jye komà iskan kjoa koi, 'an kítseè ñijòn àkjale xi jncha kixi nga ñijòn chrjangui-la isò'nde xi nchibíchjoàhikon-la tjo mé-ne nga mì tì kiì k'oa-ne ya isòn isò'nde kò isòn ndáchikon, tikoá nijngoò yá sijníyá-la. ² Tikoá kítseè ijngoà àkjale xi tinchrobá-ne ñánda bitjokàtji-ne ts'oi xi 'ya jngoò kichá ts'e Nainá xi tíjnakon xi ma sit'aà chiba-la xitá. 'Ñó kiichja-la jñà àkjale xi ñijòn ma-ne xi jye kitjoé-la nga'ño nga tsjá ch'in-la isò'nde kò ndáchikon. ³ Kitsò-la:

—Kì tà chjà ch'in 'bì-lá isò'nde kò ndáchikon kò yá, skanda k'e-né nga jye sít'aà chiba-la ya tjen-la jñà xi chì'nda-la Nainá.

⁴ Kì'nchrè-la kótjín ma-ne jñà xitá xi kisit'aà chiba-la, jngòè sìnḁ kò ichán ñijòn jmii ma-ne, ngats'ìi tje-la xitá Israel. ⁵ Jñà ngats'ìi tje-la xitá koi xi kisit'aà chiba-la: jñà tje-la Judá, tejo jmii ma-ne. Jñà tje-la Rubén, tejo jmii ma-ne. Jñà tje-la Gad, tejo jmii ma-ne. ⁶ Jñà tje-la Aser, tejo jmii ma-ne. Jñà tje-la Neftalí, tejo jmii ma-ne. Jñà tje-la Manasés, tejo jmii ma-ne. ⁷ Jñà tje-la Simeón, tejo jmii ma-ne. Jñà tje-la Leví, tejo jmii ma-ne. Jñà tje-la Isacar, tejo jmii ma-ne. ⁸ Jñà tje-la Zabulón, tejo jmii ma-ne. Jñà tje-la José, tejo jmii ma-ne. Jñà tje-la Benjamín, tejo jmii ma-ne.

Xitá xi kjin jchán ma-ne xi chroba kjoàn nikje xi íkjá

⁹ Xi jye komà, k'e nga kiskoòtsejèn, kjin jchán xitá kijtseè; ñiyá xi maxkeya-la. Yaá títsajna xitá xi ya inchrobàjìin-ne ngats'ìi nangui xi tjín isò'nde, kò ngats'ìi tje-la xitá xi tjín isò'nde, kò títsajna xitá xi chjà ngats'ìi 'én xi tjín, kò xitá xi ya nchrobá-ne ngats'ìi naxandá xi tjín. Jñà xitá koi, 'ncha kixi-né nga nguixkòn xi tíjnasòn íxile nga tíhotíxoma tikoá nga nguixkòn jè Orrè. Saà nikje chrobaá íkjá kò saà xkajén kjiya tsja. ¹⁰ Ngats'ìi xitá koi, 'ño jchán nchichjà nga tsò:

Jè Na'èn-ná xi Nainá xi tíjnasòn íxile ñánda nga tíhotíxoma
kò jè Orrè,
tsachrjekàjìin-ná kjo'in.

11 Ngats'ì jǎ̀ àkjale 'ncha kixi-né ya indù-la ñánda tǐjna xi tǐjnasòn íxile nga tíhotíxoma kò ya ñánda tǐtsajna jǎ̀ xitá jchínga xi kaàn ñijòn ma-ne, kò jǎ̀ xi ñijòn ma-ne xi tǐtsajnakon. Chinchaxkó'nchi-ñiat'aà-la skanda it'aà nangui nga kijt-seèxkón Nainá. ¹² Kitsò:

K'oaá s'ín kátama.

Nainá 'nó tǐjn-la kjoa machikon-t'in, kò kjoa jeya,
kò kjoa chjine,

tǐjn-la kjondaà, 'nó 'nga tǐjna, tse nga'ño tǐjn-la,
kò tǐjn-la kjotíxoma.

K'oas'ín kátama skanda nitá mé nachrjein-ne.

¹³ K'eé kiichja jngoò-na jǎ̀ xitá jchínga, kitsò:

—Jǎ̀ xitá xi chroba kjoàn nikje xi íkjá, zyá xitá-ne, ñánda kòf'i-ne?

¹⁴ 'An, kixan-la:

—Ngají tǐjìn-lè na'èn.

Jè kitsò-na:

—Jǎ̀ xitá koi xi tsatojìn kjo'in jè nachrjein k'e nga 'nó tse kjo'in kis'e. Kisìtsjeè nikje-la nga kò jní-la Orrè-la Nainá kisìchroba-ne. ¹⁵ Koi kjoa-la nga ya tǐtsajna-ne nguixkòn jè xi tǐjnasòn íxile nga tíhotíxoma kò nachrjein kò nitjen sís'in-la ya ingo-la. Jè xi tǐjnasòn íxile yaá kíjnajìn osen kjit'aà-la nga sìkinda. ¹⁶ Mì tì kii kjinchrá sìkjeín-ne kò mì tì kii koxínda-la. Kò mì tì kii kokà-ne yijo-la jè ndobá-la ts'oi k'e nga 'nó matsjè. ¹⁷ Nga jè Orrè xi tǐjna jngoò osen-la ñánda tǐjna xi tǐjnasòn íxile nga tíhotíxoma, jè sìkinda koni s'ín makinda orrè; jè kjoiko ñánda tǐbitjo nandá xi tǐjnakon. Nainá sìxìjno yije ndáxkòn jǎ̀ xitá koi.

8

Xi ma-ne itoò sello

¹ Jè Orrè, k'e nga jaàxìn jè sello xi ma-ne itoò, osen-la hora jñá kis'e ján ngajmiì. ² Ikjoàn kijtseè jñà àkjale xi itoò ma-ne xi 'ncha kixì nguixkòn Nainá, jngoò chrjo trompeta kits'iì-la nga jngoò ìjngoò. ³ K'ée j'ì ìjngoò àkjale xi 'ya jngoò kicha xi nguì oro jè xi tjíya chrjongó-la Nainá. Tsasíjna kixì ya ìt'aà ímìxa tsjeè-la Nainá, ikjoàn tse chrjongó-la Nainá kits'iì-la mé-ne nga ya kisìjngoòko-ne jè kjoa bìtsi'ba-la jñà xità-la Nainá. Yaá tsaká ya isòn ímìxa tsjeè xi nguì oro xi tíjna ya nguixkòn jè xi tíjnasòn íxile ñánda tíhotíxoma. ⁴ Jè ni'ndi-la chrjongó-la nainá ko kjoa bìtsi'ba-la xità-la Nainá tsijin-né ya tsja jè àkjale ya nguixkòn Nainá. ⁵ Jè àkjale kiskoé jè kicha xi tiya chrjongó-la Nainá, chinchá-isa xá'í xi títisòn ya ìt'aà ímìxa tsjeè-la Nainá. Ikjoàn kisìkatjen-sòn isò'nde; 'ñó kits'iìn ch'on, kina'ya-la jta, ki'ya-la ni'ín ch'on, ko ts'a ch'ón.

Jñà chrjo trompeta

⁶ Jñà àkjale xi itoò ma-ne ko itoò chrjo trompeta tjíma'ya tsibítsajnandaà nga sìkjindáya.

⁷ Jè àkjale xi síjna ítjòn kisìkjindáya chrjo-la. Ikjoàn ts'a jtsí ndajo ko ni'ín xi tsjájiin jní; ján kisikasén ìt'aà nanguì. Jè xi ma-ne jàn-ya-la isò'nde, jngoòya kitì; k'oa tì tjín kitì jñà yá; kitì yije xka xkoén.

⁸ Jè xi ma-ne jò àkjale kisìkjindáya chrjo-la. Ko jngoò xi okji koni jngoò nindoò xi je kji xi títi, yaá kinìkatjen-jìin ndáchikon. Nga jàn-ya-la ndáchikon, jngoòya, jní komà. ⁹ Jñà cho xi tjín-nguì ndáchikon,

jngoòya k'en xi ma-ne jàn-ya чо. K'oaá t̄is'ín komà j̄nà chitso, jngoòya chixoña xi ma-ne jàn-ya chitso.

¹⁰ Jè xi ma-ne jàn àkjale kisikjindáya chrjo-la. Jngoò ni'ño xi 'ñó je kji xi títjnga, kiskaàngui-ne nga-jmì. Jè ni'ño jè, jngoòya xajngá nandá kiskaàjiin xi ma-ne jàn-ya xajngá nandá kò ya ñánda títjo nandá. ¹¹ Jè 'ín-la ni'ño jè, xka tsja 'mì. Kò jè nandá, jngoòya kjòtsja, jè xi ma-ne jàn-ya nandá. Kjín jchán x̄it̄a k'en nga kjòtsja nandá.

¹² Jè xi ma-ne ñijòn àkjale kisikjindáya chrjo-la. Ikjoàn jngoòya kitsì'on jè ts'oi xi ma-ne jàn-ya yijo-la; kò k'oaá t̄is'ín komà jè sá kò ni'ño. Ikjoàn kòjñò jngoòya jè ts'oi kò sá kò ni'ño. Koà jngoòya kòjñò jè nàchrjein xi jàn-ya tjín-ne; kò k'oaá t̄is'ín komà k'e nga n̄itjen; mì t̄i kii kjòhiseèn-ne.

¹³ K'e nga kiskoòtsejèn, ki'nchrè jngoò-la ja xi kitoòtjen ján j̄jiin isén. 'Nó kùichja nga kitsò:

—Ima xó-ne, ima xó-ne, ima xó-ne j̄nà x̄it̄a xi tjín ján isò'nde, taxki 'oón komat'in k'e nga skindàya chrjo-la j̄nà àkjale xi ngui jàn chija-isa.

9

Chrjo trompeta xi ma-ne 'òn

¹ Jè xi ma-ne 'òn àkjale kisikjindáya chrjo-la; 'an kijtseè jngoaa ni'ño xi kiskaàngui-ne ngajmì skanda it'aà nangui. Ikjoàn kjòngatsja jè ibi ts'e n̄itjan. ² Kiskix'a jè n̄itjan. K'oaá s'ín itjo n̄i'ndi koni tsà ts'e ngajá xi 'ñó ì kjoàn. Jè n̄i'ndi xi itjo, kisijñò jè ts'oi kò j̄jiin isén. ³ Jè n̄i'ndi, yaá itjojiin чо langosta xi tsangasòn isò'nde; kits'ii-la nga'ño nga ma-la k'oe-la x̄it̄a koni чо na'yá xi tjín isò'nde. ⁴ K'oaá s'ín kisatiixoma-la nga mìkii tsjá

ch'in-la ngats'iì xka ijñá xi tjín isò'nde, ko nijngò yá; tà jñà xi koma tsjá ch'in-la jñà xita xi tsjìn-la chiba-la Nainá ya itjòn tjen-la. ⁵ Mìkì kitsjaà'nde-la nga sikk'en xita; tà kjo'iín 'òn sá tsjá-la; jè kjo'in xi tsjá, k'oaá ngaya-la koni k'e nga 'bé-la cho na'yá xita nga jò 'beé. ⁶ Nachrjein koi, jñà xita mejèn-la nga kiyá, tanga mìkì sakò-la kós'ín sikk'en yijo-la. 'Nó komejèn-la nga sikk'en yijo-la tanga mìkì koma kiyá.

⁷ Jñà cho langosta k'oaá kjoàn isén-la koni kjoàn kohòyo xi binchandaà-la kjojchán. Tjísòn sko koni corona xi nguì oro; isén-la xitaá tjín-la. ⁸ Tsja sko k'oaá kjoàn koni kjoàn ts'e íchjín; nì'ño, k'oaá kjoàn koni ts'e xa. ⁹ Ya isòn inima-la k'oaá kjoàn xi kijtsa koni kicha tájaà xi síkjeén xita kjojchán; jñà jngaá-la k'oaá s'ín na'yà-la nga one koni tsà 'ñó kjìn ma carreta xi bín-dofe kohòyo nga ongachikon nga fì kjojchán. ¹⁰ Tjín nditsin koni cho na'yá ko tjín-la na'yá. Jñà nditsin tjín-la nga'ñó nga 'òn sá sikk'i'on xita. ¹¹ Jè xi síjna sko-la cho langosta, jè àkjale ts'e nitjan. Jè 'ín-la àkjale jè, xi 'én hebreo, Abadón 'mì, koa xi 'én griego, Apolión 'mì. [Jñà 'ín koi, tsòyaá-ne: jè xi síkìts'óna.]

¹² Jyeé tsato kjo'in xi tjina itjòn xi taxkjì 'oon komàt'in xita; tanga nguì jò chija xi sa nchrobá.

Chrjo trompeta xi ma-ne joòn

¹³ Jè xi ma-ne joòn àkjale kisikjindáya chrjo-la; k'eé ki'nchrè jngoò-la jta xi ya itjojìin-ne nga ñijòn nchrajá-la jè ímìxa tsjeè xi nguì oro jè xi síjna nguixkon Nainá ¹⁴ nga kitsò-la jè àkjale xi ma-ne joòn, xi kjiya chrjo tsja:

—Chj́jnda'ñoí jñà àkjale xi ñijòn ma-ne xi tjít'aà'ñoó ya chrañà-la jè nandá xajngá je Éufrates.

¹⁵ K'eé kitjájnda'ñoó jñà àkjale xi ñijòn ma-ne xi jye k'oas'ín títsajnándaà jè hora, jè nachrjein, jè sá kò jè nó, mé-ne nga jngoóya sjik'en-ne xita xi ma-ne jàn-ya ngats'iì xita xi tjín. ¹⁶ 'An, ki'nchrè-la kótjín ma-ne jñà xita kjojchán xi kohòyo títsajnakjá-la; jò sindo millón ma-ne.

¹⁷ K'oaá s'ín tsatsejèn-na jñà kohòyo kò xita xi títsajnakjá-la nga kichá tájaà kijtsa inima-la xi inì kjoàn koni ni'ín, xi azul kjoàn koni zafiro, kò xi sinè kjoàn koni azufre. Jñà skò kohòyo, k'oaá kjoàn koni skò xa; kò ya tso'ba, ni'ín bitjo, ni'ndíí bitjo, kò azufre bitjo. ¹⁸ Jè kjoa-la nga ingajàn kjo'in koi, jngoò ya k'en xita xi jàn ya ngats'iì xita xi tjín. Jè kisik'en jè ni'ín, ni'ndí kò azufre xi bitjo-ne tso'ba kohòyo. ¹⁹ Nga'ñoó xi tjín-la kohòyo, yaá tjí'a tso'ba kò itjòn nditsin, nga jñà nditsin k'oaá kjoàn koni kjoàn ye; koa jñà skò síki'on-ne jñà xita.

²⁰ Jñà xita xi tsiningui-ne xi mìkìl k'en k'e nga jye tsato yije kjo'in koi, mìkìl kisikájno jé-la nga mì tì jé kohótsji-ne; takó jñà kijtseèxkón inima ch'o-la nejí, kò jñà isén xi Nainá tsò-la xi kichá oro, plata, bronce, ndajo kò yá, jñà xi mìkìl tsejèn-la kò xi mìkìl 'nchré kò xi mìkìl ma fi. ²¹ Jñà xita koi, mìkìl kisikájno jé-la nga mì tì jé kohótsji-ne nga xita sík'en, nga ma-la bíndaà, kò nga kjoa chijngui s'ín, kò kjoa chijé.

10

Àkjale xi kjiya tsja jngoò xojon libro jtobá

1 Ìjngoò àkjalẹ̀ kịjtseè-ìsa xi t́jín-là nga'ńó xi t́inchrobájen-ne ngajmìi nga ifi tsátijno; jẹ̀ skọ̀ kịnasòn jngoò ijñe; isén-là k'oaá kji koni ts'oi; jñà ndsokọ̀ k'oaá s'ín tsejèn koni tsà ni'ín xi ncha kixi nga títi. ² Kjinaya tsja jngoò xojon xi jtobá kji xi jye kitjájndaya. Jè ndsokọ̀ kixi tsasíjnajiin ya ndáchikon ko jè ndsokọ̀ ngaskón tsasíjnasòn nangui. ³ K'oaá s'ín 'ńó kiichja koni tsò xa k'e nga kjindáya; k'e nga jye kiichja, itoò ch'on kina'ya jta-là nga tikoá kiichja. ⁴ K'e nga jye jane ch'on xi itoò kits'iin, 'an tijnandaà-ná nga mejèn-na skijno jngoaà xojon, tanga ki'nchrè jngoò-là jta xi ngajmìi inchrobà-ne xi kitsò-na:

—Jñà 'én xi káchja ch'on xi itoò kats'iin, 'maá tikíjni; kì xojooǹ bìt'ii.

⁵ Jè àkjalẹ̀ xi 'an kịjtseè nga ya síjnajiin jngoò ndsokọ̀ ndáchikon ko xi ìjngoò ndsokọ̀ ya síjnasòn nangui, kiskímiì'nga tsja kixi ján ngajmìi, ⁶ kitsjaà 'én-là it'aà ts'e Nainá xi tíjnakon nita mé nàchrjein-ne, jè xi tsibíndaà ngajmìi, nangui ko ndáchikon, ngats'ii tsojmì xi ya t́jín, kitsò:

—Mì tì kii s'e isa-ne nàchrjein. ⁷ K'e nga kichóya nàchrjein-là nga koìts'ia jè àkjalẹ̀ xi ma-ne itoò nga siikjindáya chrjo-là, jè kjoa'ma-là Nainá kítasòn-né koni s'ín kitsò jñà xita ch'i'nda-là xi kiichja ngajo-là.

⁸ Jè jta xi ki'nchrè ítjòn-là xi ngajmìi inchrobà-ne, ìjngoò k'a kiichja-na kitsò:

—T'in, chjoí jè xojon xi jtobá kji xi jye kitjájndaya nga kjinaya tsja jè àkjalẹ̀ xi síjnakixi isòn ndáchikon ko isòn nangui.

⁹ Kiikoan jè àkjalẹ̀, kixan-là:

—Tjii-ná jè xojon jtobá xi kjinaya ndseii.

Kitsò-na:

—Chjoí, *ikjoàn chinii*; *ján iya indso'boi* kotsjaya-né, *tanga ya i'a ndso'boi*, *ixii koma-lè koni tsà tsjén*.

¹⁰ Kiskoé jè xojon xi kjiya tsja jè àkjale. K'e nga kiskínee, *kisihixil'á ndsoba koni tsà tsjén*; *tanga ján iya indso'ba kjòtsja-né*. ¹¹ Ki'mì-na:

—Mochjeén-né nga *ìjngò k'a kinókjoaya ngajo-la Nainá mé kjoa xi komat'in jña xita xi kjìn naxandá nchrobá-ne kò xi kjìn nangui chja-ne kò xi kjìn skoya 'én chja, kò mé kjoa xi komat'in xitaxá ítjòn xi tjín isò'nde*.

11

Jò ma xita xi tsjá 'én ít'aà ts'e Cristo

¹ K'ée kits'ii *jngò-na yá xi ma machibaya-ne, xi k'oà kji koni kjoàn yá nise*. Ki'mì-na:

—Tisítjin, *tichibayi jè ingo ítjòn-la Nainá kò jè imixa tsjeè-la*. *Tixkeyi kótjín ma-ne jña xita xi ya beèxkón Nainá*. ² Jè *nditsin xi kijnat'aà-la ingo, kì kii nìchibayi nga jña kitjoé-la xi taxki xita xi mìtsà xita judío*. *Jña xita koi, ichán jò sá kotixoma ya Jerusalén xi i'nde tsjeè-la Nainá*. ³ *'Aán sikkasén ingajò xita-na xi tsjá 'én ít'aà ts'an nga kichjaya jngò jmii kò jò sindo kò jàn-kaàn nachrjein; kò jña nikje xi kòkjá, nikje jmà kjoàn xi ts'e kjoaba*.

⁴ *Jña ingajò xita xi tsjá 'én, jña-né ingajò yá olivo kò ingajò kichá candelero xi jncha kixi nguixkòn Nainá xi otixoma-la isò'nde*. ⁵ *Tsà yá xi mejèn-la sikk'on xita koi; ni'in kochrje tso'ba xi jngò k'a kòkà jña xi kondra-la*. *K'oaa s'in kiyá yije, nita yá-ne xi mejèn-la sikk'on*. ⁶ *Jña xita koi tjín-la*

nga'ño nga ma-la kìichjoà-la ngajmì mè-ne mì ti kii k'oa-ne jtsí jña nàchrjein k'e nga kichjaya. Tìkooá tjin-la nga'ño it'aà ts'e nandá nga ma-la nga jní s'iin; kò komaá-la kjin skoya kjo'in tsjá-la xita isò'nde; komaá-la nga kos'in s'iin nita kótjin k'a mejèn-la nga s'iin. ⁷ Ingajò xita koi, k'e nga jye tsjá 'én-la, jè chò je xi ch'o kji xi bitjomijn-ne ya nitjan jño, skaàn-kò-né, kò sikkijne-la, ikjoàn kiyá ingajò xita koi. ⁸ Jña yijo-la xita koi, yaá sijijò osen nditsin-la naxandá ítjòn, ñánda kisit'aà krò Na'èn-ná. Jè 'ín-la naxandá ítjòn xi okji, k'oaá s'in ngaya-la koni Sodoma, o Egipto. ⁹ Xita xi ya inchrobàjijn-ne naxandá xi tjin isò'nde, kò ngats'ii tje-la xita xi tjin isò'nde, kò xita xi chja ngats'ii 'én xi tjin, kò xita xi ya nchrobá-ne ngats'ii nangui xi tjin isò'nde, ján nàchrjein osen skótsjèn-jno yijo-la mik'en; kò mikii tsjá'nde nga sijn jña xita koi xi jò ma-ne. ¹⁰ Jña xita xi tjin isò'nde kotsjaá-la nga jye k'en xita koi; tsjá kjotjò-la tsojmì xita xikjin. Koií k'oas'in s'iin-ne nga jña ingajò xita xi chja ngajo-la Nainá, tsee kjo'in tsjá-la jña xita isò'nde. ¹¹ K'e nga jye tsato xi ján nàchrjein osen, jè Nainá kisikítsajnakon ìjngò k'a-ne nga jaáya-la; ikjoàn chinchá kixi ìjngò k'a-ne; kò ngats'ii xita xi kijtsee, 'ño jchán kitsakjòn. ¹² Ingajò xita koi kiì'nchré jngò-la jta xi 'ño kùichja xi ngajmì inchrobà-ne, kitsò-la:

—Nchrobá-mijn-jno ijndé.

Ikjoàn kilmijn-jin ifi ján ngajmì. Ngats'ii jña xita kondra-la kijtsee-né. ¹³ Tik'eé-ne j'ii jngò ch'ón xi 'ño jchán ts'a; jngò ya naxandá chixoña xi ma-ne te ya kóhokji naxandá; kò jè kjoa-la ch'ón,

itoò jmiù xità k'en. Jñà xità xi tsiningui-ne, ndaà jchán kitsakjòn. Ikjoàn kùichjat'aà-la Nainá xi tíjna ngajmiù nga jeya kisikíjna.

¹⁴ Jyeé tsato kjo'in xi ma-ne jò xi taxki 'oón komàt'in xità; tanga nchrobá nitoón xi ma-ne jàn k'a.

Chrjo trompeta xi ma-ne itoò

¹⁵ Jè xi ma-ne itoò àkjale kisikjindáya chrjo-la; kjín jchán jta kina'yà-la ngajmiù xi 'ño kùichja nga kitsò:

Jñà kjotíxoma xi tjín isò'nde,

jyeé ts'e Na'èn-ná xi otíxoma-ná kò jè Cristo xi xó kinikasén-ne.

Jè kotíxoma nita mé nachrjein-ne.

¹⁶ Jñà xità jchínga xi kaàn ñijòn ma-ne, xi títsajnanè íxile nga nguixkõn Nainá, chinchaxkó'nchi-ñiat'aà-la nga kijtseèxkón Nainá. ¹⁷ Kitsò:

Na'èn xi Nainá 'mì-lè.

Ndaà chjí-lè nga ta jì tã jngoò-né xi 'ño tse nga'ño tjín-lè,

ngaji xi tijni j'ndeí,

kò xi tijni skanda kjòtseé,

[kò xi sã kjoíi jngoò k'a-ne].

Tì'biì-lèjen kjõndaà nga jyeé kachjoí nga'ño xi tjín-lè;

kò jyeé kòbíts'ji nga jì tìhotíxomai.

¹⁸ Jñà xità xi taxki xità xi mìtsà xità judío jyeé kòjti-la;

tanga jyeé ijchò nachrjein-la kjojti-lè k'e nga jì k'oi-la kjo'in xità koi,

jè nachrjein k'e nga jì kíndaàjiìn-la jñà xità xi jye k'en

ko k'oi-la kjojtò xi ok'in-la nga tjoé-la xita
 chi'nda-lè xi kiichja ngajo-lè
 ko jña xita-la Nainá ko ngats'ii xi beèxkón-lè,
 jña xi jtohá kjoàn ko xita jchínga.
 Sikjehesoìn jña xita xi ma-la síkjehesoìn xita
 naxandá isò'nde.

¹⁹ Ján ngajmiì kitáx'a i'nde tsjeè-la Nainá; ya
 iya i'nde tsjeè-la ki'ya-la jè kaxa ts'e kjoa xi
 tsibíndaàjìin Nainá ko jña xita. Ikjoàn jate ni'in
 ch'on, kina'ya-la jta, kits'iin ch'on, ts'a ch'ón, ts'a
 jtsí ndajo xi 'ño tsiaàn kjoàn.

12

Jè chjoón ko jè ye

¹ Ján ngajmiì tsatsejèn jngoò kjojkón. Jngoò
 chjoón ki'ya-la; jè ts'oi xi ma nikje-la. Jè sá yaá tíjna
 ingui ndsoko, ko jngoò corona tíj'a sko xi tejò ni'ño
 tíjt'aà. ² Jè chjoón, ki'ndí 'ya. 'Nó jchán kjindáya
 nga jye machraña nga jts'in ki'ndí-la; tseé kjo'in
 tísíkjeiín nga jye ijchò chiba-la nga jts'in ki'ndí-la.
³ Ján ngajmiì ijngoò kjojkón tsatsejèn. Jngoò ye xi
 'ño je kji tsatsejèn. Inì kji, itoò ma sko, ko jngoò
 corona ítsé tíj'a nga jngoò ijngoò sko. Tíkoaá te ma
 nchrajá-la. ⁴ Jè nditsin ye, jngoò ya ni'ño tsibíndofe
 xi ma-ne jàn ya ngats'ii ni'ño xi tíjn ngajmiì, ikjoàn
 tsibítsjot'aà nanguì. Jè ye je, tsasijnat'aà-la jè chjoón
 xi tí'beé ki'ndí mé-ne nga skine-ne ki'ndí-la k'e
 nga jye jts'in. ⁵ Jè chjoón, tsi'beé jngoò ki'ndí x'in
 nga jè kotixoma-la ngats'ii naxandá xi tíjn isò'nde
 koni jngoò xita xi yá kicha kjiya tsja nga kìnè-la
 kjo'in xita xi mìkii 'nchréñijon-la. Tanga jè ki'ndí-la
 chjoón, kitjá'an-la; yaá kùko ñánda tíjna Nainá nga

tíhotíxoma. ⁶ Jè chjoón, tsanga-né. Ján kiì i'nde it'aà xìn ñánda nangui kixì choòn, ñánda nga Nainá tsibíjnandaà jngoò-la i'nde nga ya katjiì-la tsojmì xi skìne. Jngoò jmiì kò jò sindo kò jàn-kaàn nàchrjein kíjna.

⁷ Xi jye komà iskan, ján ngajmiì kis'e kjojchán. Jè àkjale Miguel kò àkjale-la kiskaàn-kjoòkò jè ye je. Kò jè ye je, kò àkjale-la nas'ín 'ñó kiskaàn-kjoò, ⁸ tanga mìkiì kisìkijne-la, kò mì tì mé i'nde kis'e-la ján ngajmiì. ⁹ K'oaá s'ín komà nga itjokàjiìn ngajmiì jè ye jchínga xi 'mì Xità Nejí kò xi 'mì Satanás xi konachan-la ngats'ii xità isò'nde. Kinìkatjengui ya it'aà nangui kò àkjale-la.

¹⁰ Ki'nchrè jngoò-la jta ján ngajmiì xi 'ñó kiìchja xi tsò:

—I'ndeì jyeé ijchò nàchrjein nga kitjokàjiìn kjo'in xità xinguiáá nga kò nga'ñó-la Nainá nga jè kotíxoma kò kjotíxoma xi tjín-la Cristo [xi Nainá xó kisìkasén-nel], koií kjoa-la nga jye kànikatjengui jè xi kò nàchrjein kò nítjen tsját'in 'én ndiso xità xinguiáá nga nguixkòn Nainá. ¹¹ Jñà xità xinguiáá, nga nguì koó nga'ñó xi tjín-la jní xi tsibíxteèn jè Orrè kisìkijne-la kò nguì koó jñà 'én xi kitsjaà it'aà ts'e Nainá. Mìkiì kitsakjòn-la nas'ín kinìk'en. ¹² Tsja kàtas'e-la ngajmiì kò jñà xi ya títsajna. Tanga ima xó-nò jñò xi ya títsajnaà it'aà nangui kò xi títsajnaà ya jjiìn ndáchikon nga jè xità nejí jyeé ijchòjen-tjìngui-nò kò 'ñó jti tjín-la nga jyeé tíjiìn-la nga ta chiba nàchrjein kíjna-isa.

¹³ Jè ye xi 'ñó je kji, k'e nga kinìkatjengui it'aà nangui, tsangatjìngui-la jè chjoón xi tsi'beé ki'ndí x'in. ¹⁴ Tanga jè chjoón, jò jngaá ts'e ja kits'ii-la

xi 'ńó ìi kjoà̀n mé-ne koma tótjen-ne nga konga-la jè ye xi je kji. Ján kii kína ya i'nde it'aà xìn ñánda nangui kixi choòn. Jàn nó osen kína nga kòkinda nga tjoé-la tsojmì xi skine. ¹⁵ Jè ye xi je kji, tsachrje nandá tso'ba nga ndána koma mé-ne nga koma kichrjoako-ne jè chjoón. ¹⁶ Tanga jè nangui kisichját'aà-la jè chjoón; kitáx'a, kits'ii ndána xi jè ye tsachrje tso'ba. ¹⁷ Jè ye isaá 'ńó kjòtikeè jè chjoón. Kii tjingui kondra-la jña xita tje-la chjoón nga kiikjaán-ko jña xi síkitasòn kjotixoma-la Nainá ko jña xi ndaà tsjá 'én it'aà ts'e Cristo. ¹⁸ Jè ye, yaá tsibìjnajiìn tsoimì xi 'ncha indii ndáchikon.

13

Jò cho ìi xi ch'o kjoàn

¹ Kijtseè jngoàà cho je xi ch'o kji xi itjo-mijìn-jìin-ne ndáchikon xi itoò ma skò; te ma nchrajá-la; jngoò corona itsé tji'a nga ìjngoò ìjngoò nchrajá-la; jña skò tjit'aà 'ín xi Nainá chjajno-la. ² Jè cho je xi ch'o kji xi 'an kijtseè, k'oaá kji koni kjoàn xa indo; k'oaá kjoàn ndsokò koni ts'e cho oso; k'oaá kji tso'ba koni tso'ba xa. Jè nga'ńó xi tjín-la jè ye, ko jè i'nde-la ñánda tíhotixoma, ko jè kjotixoma-la xi 'ńó tjín, jè cho ts'en kjòngatsja. ³ 'Nó tse kitii jngoò skò jè cho je xi ch'o kji; k'oaá kji komà koni tsà jye kiyá; tanga jè skò xi 'ńó tse kitii, kjòndaà-ne. Ngats'ii xita xi tjín nga títsa isò'nde, tà kjòxkón-la kjoa xi komà, ko yaá kiitjingui-la jè cho ts'en. ⁴ Ngats'ii xita kijtseèxkón jè ye, nga jè ye kitsjaà-la kjotixoma xi tísíkjeén jè cho ts'en. Jña xita tikoáá kijtseèxkón jè cho je xi ch'o kji. Ikjoàn kitsò:

—Ts̄jìn ìjngò ìsà koni jè chò je xi ch'o kji; mì yá t̄jín xi kichikjoa-là nga skaàn-ko.

⁵ Jè chò ts'en kitjò'ndeé-là nga kiichja 'én xi 'nga síkíjna yijo-là nga chjajno-là Nainá. T̄ikoáá kits'ì'nde-là nga ichán jò sá kotixoma. ⁶ K'oaá s'ín kis'ìin; kiichjajno-là Nainá, kiichjajno-là 'ín-là Nainá kò Ni'ya Tsjeè-là, kò kiichjajno-là j̄nà x̄ita xi t̄itsajna ngajmì. ⁷ T̄ikoá kitjò'ndeé-là nga kiskaàn-ko x̄ita-là Nainá skanda kó nga kisikijne-là. Ikjoàn kits'ì-là kjotixoma it'aà ts'e ngats'ì tje-là x̄ita, kò it'aà ts'e ngats'ì naxandá xi t̄jín, kò it'aà ts'e ngats'ì x̄ita xi chja ngats'ì 'én xi t̄jín, kò it'aà ts'e x̄ita xi t̄jín nga ìjngò ìjngò nangui xi t̄jín isò'nde. ⁸ Ngats'ì x̄ita xi t̄jín nga t̄jtsa isò'nde, jè chò ts'en skoexkón, j̄nà ngats'ì x̄ita xi mìkìl t̄jít'aà 'ín-là nga t̄isa t̄ats'en-là kjoa, jè xojon xi ts'e kjoabinachon xi ts'e Orrè-là Nainá xi k'en ngajo-là x̄ita.

⁹ Ndaà t̄iná'yaà koni xan-nò. ¹⁰ Jè xi ndayá kjis'en, k'oaá s'ín t̄jínè-là nga ndayá kjoì. Jè xi kichà ndojò kiyá-ne, k'oaá s'ín t̄jínè-là nga kichà ndojò kiyá-ne. Íí mochjeén nga kixì kitsajna kjit'aà kò nga kichikjoako-là kjo'in j̄nà x̄ita-là Nainá.

¹¹ Xi komà iskan k̄jtseè ìjngoà chò je xi ch'o kji xi itjo mijìn-ne ijìn nangui. Jò ma nchrajá-là xi k'oa kjoàn koni nchrajá-là orrè. K'oaá s'ín chja koni jngò yè xi 'nó je kji. ¹² K'oaá s'ín t̄jín-là kjotixoma koni jè chò je xi ch'o kji xi t̄jna ítjòn nga yà síjna nguixkón. Bínè-là x̄ita xi t̄jín isò'nde nga k̄ateèkón jè chò je xi ch'o kji xi t̄jna ítjòn, jè xi kjòndaà-ne ñánda 'nó tse kitìl jngò sko. ¹³ T̄ikoáá maá-là kis'ìin kjoèkón xi

'in tjin. Skanda maá-la kisikjinchrobà-jen ni'in xi ngajmiì nchrobá-ne skanda it'aà nangui nga nguixkon xita. ¹⁴ Kiskoònachan-la xita xi tjin isò'nde, koií kjoa-la jña kjojkón xi kits'ii'nde-la nga kis'iin nguixkon cho je xi ch'o kji xi tjna ítjòn. Tsibít'in-la xita nga kátindaà jngoò xkósòn-la jè cho xi tjna ítjòn xi kichà ndojò kitii-ne skò tanga jaáya-la. ¹⁵ Jè cho xi ma-ne jò kits'ii-la nga'ño nga kisikijnakon jè xkósòn-la cho xi kisin-daà, mé-ne nga koma kichja-ne kò ngats'ii xita xi mikì skoexkón sikk'en-ne. ¹⁶ K'oaá s'in tsibínè-la nga kátasit'aà chiba-la jña xi xita ixti, jña xita jhínga, jña xita nchiná kò jña xita ima, jña xita xi títsajnadejí kò xi chí'nda títsajna'ño. Yaá kátasit'aà chiba-la ya tsja kixi kò tsà ya ítjòn tjen-la. ¹⁷ Nijngoò xita xi ma kotse tsojmì, nijngoò xi ma kotjna tsà mikì tjít'aà chiba-la kò tsà jè 'ín-la cho mikì tjít'aà-la kò tsà mikì tjít'aà-la número ts'e 'ín-la cho. ¹⁸ Ijndé mochjeén kjoachjine-la xita; jè xi ndaà machiya-la, kátixkeya número-la cho je xi ch'o kji; ts'e xita-né. Jè número: joòn sìndo kò jàn kaàn kò joòn.

14

Jè Orrè-la Nainá kò jña xita xi jngoò sìndo kò ichán ñijòn jmiì ma-ne

¹ Xi komà iskan, kiskoòtsejèn, kijtseè jè Orrè, nga síjnaxixi isòn nindoò Sión kò xita xi jngoò sìndo kò ichán ñijòn jmiì ma-ne xi tjít'aà ítjòn tjen-la 'ín-la Orrè kò ts'e Na'èn-la. ² Ki'nchrè jngoò-la jta xi ngajmiì nchrobá-ne xi 'ño tíhone koni ma nandá k'e nga 'ño maje, koni ma nga faáya-la ch'on k'e nga

jye ts'iin; k'oaá s'ín ki'nchrè-la koni tsà kjìn ma xita xi síkjane ní'ño arpa. ³ Tína'yà jngoò-la sò xitse nga tíjnda nguixkon jè xi tíjnasòn íxile nga tíhotixoma, kò ya nguixkon xi ñijòn ma-ne xi títsajnakon kò ya nguixkon jña xita jchínga. Niyá xi ma-la seè jè sò xi tíjnda, ta jña-né xi jngoò sìndo kò ichán ñijòn jmù ma-ne, jña xi jye itjokàjiin kjo'in ya isò'nde. ⁴ Jña xita koi, mìtsà íchjín tsibìtsajnakò, ngui tsjeè kisijchá yijo-la. Jña-né xi fi tjíngui-la Orrè nita ñánda-ne nga fi. Jña-né xi itjokàjiin ítjòn kjo'in ngats'ì it'aà ts'e xita xi tjín isò'nde, mé-ne nga koma kongatsja ítjòn-ne Nainá kò Orrè. ⁵ Nímé 'én ndiso kiichja, kò nímé jé tjín-la nga nguixkon Nainá.

Àkjale xi jàn ma-ne

⁶ Kijtseè ìjngoàà àkjale xi tsó'bajiin isén nga tífiko 'én ndaà-la Nainá xi tjín nita mé nàchrjein-ne nga keènojmi-la jña xita xi títsajna isò'nde, ngats'ì xita xi tjín nga ìjngoò ìjngoò nangui, ngats'ì tje-la xita, ngats'ì xita xi chja ngats'ì 'én xi tjín, kò ngats'ì xita xi tjín nga ngats'ì naxandá xi tjín isò'nde. ⁷ Ñó chja kitsò:

—Jchaxkón Nainá, jeya tikíjna; jye ijchò nàchrjein-la nga koiindaajiin. Jchaxkón jè xi tsibíndaà ngajmì, xi tsibíndaà nangui, xi tsibíndaà ndáchikon kò ñánda tíbitjo nandá.

⁸ Ìjngoò àkjale kiichja xi kitsò:

—Jyeé kakaàngui, jyeé kakaàngui Babilonia, naxandá xi 'ño je kji, jè xi bí'tin-la naxandá xi tjín isò'nde nga [kj'eí nainá fit'aà-la] koni s'ín xita k'e nga kjoachijngui s'ín. Koni s'ín kis'ìin, k'oaá

ngaya-la koni tsà kisìch'i yije xita isò'nde jè xán ts'e kjoachijngui-la xi tjikò kjojtì-la Nainá.

⁹ Ìjngò òkjale tsatsejèn xi ma-ne jàn xi 'ño chja nga kitsò:

—Tsà yá xi skoexkón jè cho je xi ch'o kji ko isén xkósòn-la, tsà tìkoà sít'aà chiba-la itjòn tjen-la, o tsà tsja, ¹⁰ Nainá tsjá-la kjo'in, k'oaá ngaya-la koni tsà vino skoí xi tjikò kjoajti-la Nainá. Nga jè sobà Nainá jyeé tsibíndaà jngò chitsín vino xi 'ño kjaán mé-ne nga kokò-ne kjoajti-la nga s'e-la kjo'in jjiin ni'in azufre xi 'ño tsjè títi. Tíkotsejèn òkjale tsjeè kò Orrè. ¹¹ Jè ni'ndi-la ts'e kjo'in-la, kjit'aá nachrjein nita kjé-ne nga kitjomijìn. Mikiì sikkjáya kò nachrjein kò nitjen jña xita xi jè cho ts'en kò isén xkósòn-la beèxkón, jña xi tìkoà tjit'aà chiba-la kò 'ín-la jè cho je xi ch'o kji. ¹² Ìjndé nga mochjeén nga kàtachíkjoa-la nita mé kjoa-ne jña xita-la Nainá xi síkitasòn kjotíxoma-la kò xi ndaà mokjeiín-la it'aà ts'e Jesús.

¹³ Ki'nchrè ìjngoaà 'én xi ngajmiì inchrobà-ne xi kitsò-na:

—Chjí, tít'eii xojon: “Jña nachrjein xi fi-isa, mé tà ndaà-la jña xita xi kiyá nga mokjeiín-la it'aà ts'e Na'èn-ná.” K'oaá tsò Inima Tsjeè-la Nainá: “Kixí kjoa, jña xita koi sikkjáya-né kjoa ts'e xá-la; ján ngajmiì, jchaá-la ngats'ii kjoa xi ndaà kis'iin.”

K'e nga maxkó tsojmì xi jye kòjchá ya it'aà nangui

¹⁴ K'e nga kiskoòtsejèn, kijtseè jngoaà ifi xi chroba kji, ya isò'nga ifi tíjna jngò xi k'oa kji koni ki'ndí-la xita. Jngò corona xi nguì oro tjí'a sko, kò jngò kicha libá kjiya tsja xi 'ño yijò kji.

15 Ìjngoò àkjalẹ itjo ya ì'nde tsjeè-là Nainá xi 'ńó chja, kitsò-là jè xi t́jnasòn ifi:

—Tits'ii nga t́xákoji kichá libá-lè; t́ichásoìn, kó t́xkoí kóhótjín tsojmì tjè xi t́jín it'aà nangui nga jye kòjchá yije; kó jyeé ijchò nàchrjein-là nga sincháxkó.

16 Jè xi t́jnasòn ifi, tsibíts'iaḱo kichá libá-là ya isòn nangui nga tsatesòn tsojmì tjè-là isò'nde, ìkjoàn chincháxkó.

17 Ìjngoò àkjalẹ itjo ya ì'nde tsjeè-là Nainá xi kijna ngajmì xi t́koḱ kichá libá kjiya tsja xi 'ńó yijò kji.

18 Ìjngoò àkjalẹ itjo-ne it'aà ímíxa tsjeè-là Nainá, jè xi síkindá ní'ín. 'Nó kiichja-là jè àkjalẹ xi kichá libá kjiya tsja; kitsò-là:

—Tits'ii nga t́xákoji kichá libá-lè xi 'ńó yijò kji; t́ichát'eìl 'én-là j́nà toò uva xi t́jín it'aà nangui, nga j́nà toò-là jye kichji.

19 Jè àkjalẹ tsibíts'iaḱo kichá libá-là nga tsatet'aà toò-là j́nà yá uva; ìkjoàn kisìkatsjoḱya ya ñánda nga ma binchanè toò uva. Kjoḱ koi, jè okó kjoajti-là Nainá. 20 Mítsà ya jjiìn naxandá kisinè j́nà toò uva; ján indii naxandá kisinè; k'e nga jye kisinè, jní itjo ñánda nga kisinè; 'ńó tse jní itjo skanda ijchò kangui-là kó kji 'nga t́jna freno xi t́j'a tso'ba kohòyo kó jàn sìndḱ kilómetro tsangasòn.

15

Itoò ma àkjalẹ xi itoò kjo'in j'ùko

1 Ìjngoò kjoḱkón kìjtseè ján ngajmì xi 'ńó xkón kji kó 'ńó jeya ki'ya-là. Itoò ma àkjalẹ xi itoò kjo'in j'ùko j́nà kjo'in xi fehet'aà-ne nga yaá fehet'aà-ne kjoajti-là Nainá.

² Tìkōa kìjtseè jngoàà ndáchikon xi chĩtsín kji; tsjájìn kō nì'ín. Yá ncha kixi isòn ndáchikon xi chĩtsín kji, jñà xitá xi jye kisìkijne it'aà ts'e cho je xi ch'o kji kō isén xkósòn-la, jñà xi mìkì kitsjá'nde nga kisit'aà chĩba-la, kō número ts'e 'ín-la. Xitá koi kjiya tsja ní'ño arpa xi Nainá kitsjaà-la. ³ Nchiseè sò-la Moisés xi chĩ'nda-la Nainá kō sò-la Orrè, nchitsò: Nà'èn xi Nainá 'mì-lè, xi ta jì tã jngoò-né xi 'ño tse nga'ño tjín-lè,

'ño jeya kō 'ño xkón tjín ngats'ìi kjoa xi 'nì.

Xitá kixi-né; kixi'í tjín ndiyá-lè.

Jií-né xi Xitaxá Ítjòn tìjna-la ngats'ìi naxandá xi tjín isò'nde.

⁴ ¿Yá xi mìkì tsakjón-lè Nà'èn?

¿Yá xi mìkì skoexkón-lè?

Tajngoò ngaji xi xitá tsjiì,

koií k'oas'ín kjoji-ne ngats'ìi naxandá-la isò'nde nga skoexkón-lè

nga jye tí'ya-la kjoa kixi-lè.

⁵ K'e nga jye kìjtseè kjoa koi, kiskoòtsejèn nga kitáx'a ján ngajmì jè i'nde tsjeè-la Nainá xi tìjnaya iya Ni'ya Nikje xi okó nga ya tìjna Nainá. ⁶ Itjo ya i'nde tsjeè-la Nainá jñà àkjale xi itoò ma-ne xi j'ìiko itoò kjo'in. Íkjá nikje lino chroba xi 'ño ote kjoàn; tìkjá ndáyá-la na'ño payo xi nguì oro. ⁷ Jñà xi ñijòn ma-ne xi títsajnakon, jngoò itjojìin xi kisìngatsja nga íjngó íjngó àkjale xi itoò ma-ne; kitsjaà íjngó íjngó-la chĩtsín xi nguì oro xi ya tìjya kjo'in ts'e kjoajti-la Nainá xi tìjnakon nita mé naxrjein-ne. ⁸ Yá iya i'nde tsjeè-la Nainá, kitseè nì'ndi xi ya inchrobà-ne it'aà ts'e kjoajeya-la Nainá kō nga'ño xi tjín-la. Niyá xi kitjò'nde-la nga jahas'en ya i'nde

tsjeè-là Nainá skanda k'e nga jye tsitasòn yije jñà kjo'in xi itoò ma-ne xi j'ìiko jñà àkjale xi itoò ma-ne.

16

Chitsín xi itoò ma-ne

¹ Ki'nchrè jngoàà 'én xi ya itjo-ne i'nde tsjeè-là Nainá nga kitsò-là jñà àkjale xi itoò ma-ne:

—Tanguió, tíxteèn-sòn isò'nde jñà xi tjíya chitsín xi itoò ma-ne, kjo'in xi tjiko kjoajti-là Nainá.

² Kii jè àkjale xi tsako ítjòn-là. Tsibíxteèn-sòn isò'nde xi tjíya chitsín-là. Ngats'ìi xita xi tjín-là chiba-là cho ts'en ko xi beèxkón jè isén xkósòn-là jè cho je xi ch'o kji, tsako-là ch'in xajtsé xi 'ñó ch'o kjoàn ko ijò jchán ma.

³ Jè àkjale xi ma-ne jò tsibíxteèn-jiìn ndáchikon xi tjíya chitsín-là. Ko jè ndáchikon, nguì jní komà, koni tsà ya k'en-jiìn xita. Ngats'ìi xi títsajnakon ya ijiìn ndáchikon jngoò k'aá k'en.

⁴ Jè àkjale xi ma-ne jàn, tsibíxteèn-jiìn ya xajngá nandá ko ñánda tíbitjo nandá, jè xi tjíya chitsín-là. Saà jní komà. ⁵ Ikjoàn ki'nchrè-là jè àkjale xi ts'e nandá, kitsò:

—Ngaji Na'èn, tjín-lè kjoakixi, nga k'oaá s'ín kits'ìi-là kjo'in jñà xita it'aà ts'e kjoa koi, nga jii xi xita tsjeè 'mì-lè, jii xi tijni skanda kjòtseé, tijni skanda i'nde. ⁶ Nga jñà xita koi tsibíxteèn jní-là xita-lè nga jñà kisik'en, ko xita xi kiichja-ngajo-lè. I'nde ngaji k'oaá tis'ín tì'biì ngajo-là jní nga nchi'biì; yaá chiba-là.

⁷ Tikoà ki'nchrè jngoò-là 'én xi ya it'aà ímíxa tsjeè-là Nainá chja, nga tsò:

—Ji Na'èn xi Nainá 'mì-lè, xi ta ji ta jngoò-né xi 'ño tse nga'ño tjín-lè, kixií kjoa, jñà kjo'in xi tí'biì-là xita koi, ndaá tjín ko ngui kixií tjín.

⁸ Jè àkjale xi ma-ne ñijòn, tsibíxteèn xi tjíya chĩtsín-là ya isòn ts'oi. Jè ts'oi kitjò'nde-là nga jè ndobá-là kisichjàn yijo-là xita. ⁹ Jè ndobá-là ts'oi 'ño kisichjàn-là ngats'iì xita tanga jñà xita koi mìkiì kisikájno jé-là ni mìkiì jeya kisikájna Nainá; ta saá kiichjajno-là Nainá nga jè xi tjín-là nga'ño it'aà ts'e kjo'in koi.

¹⁰ Jè àkjale xi ma-ne 'òn, tsibíxteèn-sòn jè xi tjíya chĩtsín-là ya ñánda tíhotíxoma jè cho ts'en. Ko jè i'nde ñánda tíhotíxoma jè cho je xi ch'o kji, kòjñò-né. Jñà xita xi beèxkón jè cho ts'en kiskinetjòn nijen-là nga 'ño ijò komà-là. ¹¹ Tanga mìkiì kisikájno jé-là; tà saá isa ndaà kiichjajno-là Nainá xi ts'e ngajmii, koií kjoa-là nga ijò komà yijo-là nga xajtsé tjín-là.

¹² Jè àkjale xi ma-ne joòn tsibíxteèn-jiin xi tjíya chĩtsín-là ya xajngá nandá-je Éufrates. Jè nandá-là xajngá, kixiya-né, mé-ne nga koma kjoahato-ne jñà xitaxá ítjòn xi nchrobá-ne ñánda bitjokàtji-ne ts'oi.

¹³ Kijtseè-ná nga jè ye xi 'ño je kji, ko jè cho je xi ch'o kji, ko jè xita xi kiichjaya 'én ndiso nga itjo-ne tso'ba jàn inima ch'o xi cho xke kjoàn. ¹⁴ Jñà-né inima ch'o-là neíi xi s'ín kjoèkón; bitjo nga bíxkóya xitaxá ítjòn xi tjín nga tíjtsa isò'nde nga kjinchrobà kjoichán jè nachrjein xi jye tjíndaà-là Nainá xi ta jè tajngoó xi 'ño tse nga'ño tjín-là. ¹⁵ “Tiná'yaà, 'an, k'oaa s'ín kjoiaa koni s'ín f'iì xita chijé. Mé ta ndaà-là jè xita xi tíjndaà k'e nga 'an xi kjoiaa; kjijnandaà nikje-là nga kòkjá; mé-ne nga mìkiì

kosobà-la nga tǐjna laká.” ¹⁶ Jǎnà inǐma cho-la neǐ tsibíxkóya xǐtaxá ítjòn-la isò'nde ya ì'nde ñánda 'mì Armagedón xi 'én hebreo.

¹⁷ Jè àkjale xi ma-ne itoò, tsibíxteèn jǐin isén xi tǐya chǐtsín-la. Kii'nchré-la 'én xi 'ñó kiichja xi ya inchrobà-ne ì'nde tsjeè-la Nainá xi tǐjna ngajmì ñánda tǐjna jè xi tǐjnasòn íxile nga tíhotíxoma; kitsò:

—Jyeé tsitasòn yije.

¹⁸ Ikjoàn jate ni'ín ch'on, kina'ya-la jta, kits'iin ch'on, ts'a ch'ón xi 'ñó jchán ts'a; ni saà jngoò k'a k'oas'ín 'ba kóni nga tǐsa tsatsejèn xǐta isò'nde.

¹⁹ Jè naxandá je xi 'ñó ndaà yaxkon-la, jàn ya komà. Kò jǎnà naxandá xi chja-ne nga ìjngoò ìjngoò nangui xi tǐn isò'nde, jngoò k'aá kichijà. Kò jè naxandá je xi 'mì Babilonia xi 'ñó ndaà yaxkon-la, mìkii kisijchàajǐin Nainá nga kitsjaà-la kjo'in, k'oaa ngaya-la koni kisik'iì jngoò chǐtsín xi tǐya vino xi nguì kjoajti-la Nainá xi jè jye tǐjnandaà-la. ²⁰ Ngats'iì nangui xi tǐn jǐin ndáchikon kò jǎnà nindoò, jngoó k'aá kichijà, mì tǐ kii ki'ya-la.

²¹ Jǎnà xǐta tsanè jtsí ndajo xi 'ñó tsiaàn kjoàn, tǐn-la tsà ichán kilo nga jngoò ìjngoò. Jǎnà xǐta, 'on kiichjajno-la Nainá, koií kjoa-la nga tse kjo'in kis'e-la kjoa ts'e jtsí ndajo.

17

Kós'in s'e-la kjo'in jè chjoón chijngui

¹ J'ì jngoò jǎnà àkjale xi itoò ma-ne xi itoò chǐtsín tǐya tsja, kiichja, kitsò-na:

—Nchroboí, kokoò-lè kjo'in xi tjoé-la jè chjoón chijngui xi 'ñó ndaà yaxkon-la xi tǐjnandiì ñánda nga kjìn xajngá nandá fahato. ² Jǎnà xǐtaxá ítjòn

xi t̄jín isò'nde, yaá tsafáhihtakò chjoón jè nga kj'eíi nainá kijtseèxkón k'oaá ngaya-la tsà kjoa chijngui kisìkò jè chjoón. Kò ngats'ìi x̄it̄a xi t̄jín isò'nde, k'oaá t̄i kis'ìin nga kj'eíi nainá kiit̄j̄ngui-la k'oaá ngaya-la koni tsà xán ts'e kjoachijngui-la chjoón kjòch'ì-ne.

³ It'aà ts'e Inima Tsjeè-la Nainá, jè àkjale kiikò inima-na jngoò ì'nde it'aà xìn ñánda nangui kixì choòn. Kijtseè jngoàà chjoón xi t̄j̄nakjá-la cho je xi ch'o kji xi inì kji. Yijàjno yije yijo-la 'én xi kondra ts'e Nainá nga chjajno-la. Itoò ma skò kò te ma nchrajá-la. ⁴ Jè chjoón, nikje skò kò nikje inì kjoàn xi íkjá. Yijàjno xi nguì oro kò ndajò ote xi 'ñó ts'e chji-la, kò ndátòn fangui xi 'ñó chjì-la xi 'mì perla. Tjiya tsja jngoò ch̄itsín xi nguì oro; jè ch̄itsín kitseé kjoa ch'o-la kò kjoa t̄jé xi ts'e kjoa chijngui-la. ⁵ Ya it̄jòn t̄jen-la, t̄jít'aà 'én 'ma xi tsò: “Babilonia xi 'ñó je kji nga ndaà yaxkon-la, jè nea-la íchjín chijngui kò ngats'ìi kjoa ch'o xi t̄jín isò'nde.” ⁶ K'e nga kiskod'an chjoón jè, kijtseè xkoaàn nga ch'ì-né nga jnì-la x̄it̄a-la Nainá kits'ìi kò ts'e x̄it̄a xi kinìk'en nga 'én-la Jesús kiichjaya. K'e nga kijtseè tà kjòxkón-na. ⁷ Kitsò-na jè àkjale:

—¿Mé-ne maxkón-lè? 'Aán, kènojmi-lè kó tsòya-ne kjoa 'ma-la chjoón jè, kò it'aà ts'e cho je xi ch'o kji xi t̄j̄nakjá-la xi itoò ma skò koa te ma nchrajá-la. ⁸ Jè cho xi kà'yi, tsibìjnakon-né, t̄anga ì'ndeì t̄j̄nak'en-né; yaá kj̄inchrobà mijìn-ne n̄it̄jan j̄nò mé-ne nga jngoò k'a chija-ne. J̄nà x̄it̄a xi t̄jín isò'nde, xi mìkiì t̄jít'aà 'ín-la xojon ts'e kjoabinachon kóni nga t̄isa kisindaà isò'nde, tà koxkón-la k'e nga skoexkon jè cho xi tsibìjnakon, kò ì'ndeì t̄j̄nak'en-né, t̄anga kotsején ìjngoò k'a-ne.

9 'Íjndé mochjeén kjohítsjeèn xi tjín-la kjoa chjine. Jñà skò cho xi itoò ma-ne, jñà ngaya-la jñà nindoò xi itoò ma-ne ñánda tíjnanè jè chjoón. Tíkooá jñà ngaya-la xi itoò ma-ne xitaxá ítjòn. 10 'Òn ma-ne xi jye k'en, jngoò ma xi tíhotíxoma-ìsa, kò jè xi ìjngoò, kj'eè kii f'ii. Tanga k'e nga kjoii, tà chibaá nachrjein kotíxoma. 11 Jè cho je xi ch'o kji xi tsibìjnakon tanga i'ndeì tíjnak'en-né, jè xi ma-ne jìin xitaxá ítjòn. Yaá tíjnajiìn-la xi itoò ma-ne, kò yaá tífi ñánda nga jngoò k'a jchija.

12 'Jñà nchrajá xi te ma-ne xi kà'yi, jñà ngaya-la xitaxá ítjòn xi te ma-ne xi kj'eè kii tjoé-la kjotíxoma. Tanga k'e nga tjoé-la kjotíxoma ta jngoò hora kotíxomakjoò kò jè cho je xi ch'o kji. 13 Jñà xitaxá ítjòn xi te ma-ne, tajngoó kjohítsjeèn tjín-la nga jè cho je xi ch'o kji sùngatsja nga'ño-la kò kjotíxoma-la. 14 Ikjoàn skaàn-kò jè Orrè, tanga jè Orrè sùikijne-né. Nga jè-né xi otíxoma-la jñà xita xi otíxoma, kò Xitaxá Ítjòn-laá ma jñà xi xitaxá ítjòn títsajna. Jñà xita xi títsajnakò, xó kinokjoà-la, xó kitjaàjìin-ne, kò kixii síkitasòn-la.

15 Jè àkjale k'oaá ti kitsò-na:

—Jè nandá xi kà'yi, ñánda tíjrandiì chjoón chingui, naxandá-né, xita kjín-né, jñá-né xita xi tjín nga ìjngoò ìjngoò nangui xi tjín isò'nde, koa jñá-né xita xi chja ngats'ii 'én xi tjín isò'nde. 16 Jñà nchrajá xi te ma-ne xi kà'yi, kò jè cho je xi ch'o kji xi kà'yi, sùjtikeè-né jè chjoón chingui, kjoaá'an yije-la skanda jñà nikje-la, sùikájna laká-né. Yijo-la skine-né. Ikjoàn yaá kòkájìin ni'ín. 17 Nainá k'oaá s'ín tsibìjìin kjohítsjeèn-la jñà xita koi nga k'oas'ín sùikitasòn koni s'ín mejèn-la Nainá. Jè kjotíxoma

xi tjin-la xita koi tingoò ikon nga jè cho ts'en kongatsja, skanda k'e nga kitasòn yije 'én xi kiichja Nainá. ¹⁸ Jè chjoón xi kà'yi, jè-né naxandá je xi otixoma-la jña xitaxá ítjòn xi tjin isò'nde.

18

Kós'in kiskaàngui jè naxandá Babilonia

¹ Xi jye komà iskan, ijngoò àkjale kijtseè xi tinchrobájen-ne ngajmì, xi 'ño tse nga'ño tjin-la. Jè kjoa jeya-la xi 'ño ote kji, kisihiseèn-sòn nangui.

² 'Ñó kiichja, kitsò:

—Jye kiskaàngui, jye kiskaàngui naxandá je Babilonia. Jyeé ta i'nde-la inima ch'o-la neí komà, ya nanda kitseè yije inima tjé xi ch'o kjoàn. Ko ya titsajna nise xi ch'o kjoàn xi mikì ma chine.

³ Ngats'ìi xita isò'nde, k'oaá ti kis'ìn koni s'ín xita naxandá jè nga kjeí nainá kiitjingui-la, k'oaá ngaya-la koni tsà kjòch'i-ne jña kjoachijngui xi kis'ìn. Jña xitaxá ítjòn-la xi tjin nga tjtisa isò'nde, k'oaá ti kis'ìn. Ko jña xita isò'nde xi tsojmì otseya nga s'ín kjohima, kjòch'íná-né xi kjoa ts'e kjotsja-la yijo-la koni s'ín jña xita xi tjin naxandá jè.

⁴ Ijngoò 'én ki'nchrè xi ngajmì inchrobà-ne, xi kitsò:

—Jño xi naxandá ts'an xan-nò, tìtjokàjñoò naxandá jè, mé-ne nga mì ya kòkòt'aà-nò jé-la, tikoá mikì kòkòt'aà-nò kjo'in xi s'e-la. ⁵ Jña jé-la, jyeé tímakjìn, jyeé j'ìi skanda i ngajmì. Nainá, mikì sùjchàajiìn [nga tsjá-la kjo'in] xi kjoa ts'e jé-la. ⁶ K'oaá tis'ín kàtamát'in ngajo-ne koni s'ín kis'ìn jè. Jò k'a k'oa tis'ín kàtamát'in ngajo-ne koni

tjín kjoa xi kis'iìn. Jè chĩtsín xi kisikáyajiìn vino, kòkji tìkájììn ngajo-là nga jò k'a ìsà jchá kàtama, [jò k'a òkji kjo'in kàtako-là]. ⁷ Jè kjoa-là nga jeya kisikíjna yijo-là kò nga 'ńó kis'e-là kjotsja, k'oa tìs'ín tjiì ngajo-là kjo'in nga kàtakjindáya. Nga k'oaá tsò inìma-là: “An, k'oaá s'ín tìjna nga chjoón skò-là 'mì-na. 'An mìtsà chjoón ka'àn 'mì-na, tìkoaá mìkiì siikjiaán kjo'in nìta kjé-ne.” ⁸ Koiì kjoa-là nga tajngoò nàchrjein kitjojenè-là kjo'in: Kiyá xitá-là. Tìkoaá skìndàya-né. S'èé-là kjoa ts'e kjinchrá. Nì'ín kiti-ne nga kjoehesòn. Nga 'ńó tse nga'ńó tjín-là jè Nainá xi otíxoma nga k'oaá s'ín jye kiskoòsòn-là nga tsjá-là kjo'in.

⁹ Jñà xitaxá ítjòn-là isò'nde 'ńó skìndáyakeè kò 'ńó 'on kòma-là k'e nga skoe nga tíbitjo nì'ndi-là nga títi jè naxandá jè ya ñánda kùtjìngui-là xi k'ejí nainá k'oaá ngaya-là koni tsà jngoó chjoón chijngui kùtjìngui-là nga kisitsjako yijo-là. ¹⁰ Kjiín kìncha-ne nga skótsejèn-là, nga tsakjón-là kjo'in-là. 'Nó kichja, kìtso:

—Ima xó-ne, ima xó-ne naxandá je Babilonia xi 'ńó kis'e-là nga'ńó; tajngoò tjò kòf'ì-là kjo'in.

¹¹ Jñà xitá xi otíjnaya tsojmì xi tjín isò'nde, tìkoaá skìndáyakeè-né nga 'on kòma-là inìma-là nga mì tì yá xi kòtse-ne tsojmì xi otíjnaya, ¹² tsojmì xi ts'e ton oro, plata, ndajo chjí xi 'ńó ndaà kjoàn, ndáton chjí xi 'ńó ndaà kjoàn; nikje lino xi 'ńó chjí, kò nikje seda, nikje sko kò xi inì kjoàn; ngats'ì yá xi 'ńó ndaà jne, tsojmì chjí xi nindaà nì'ńo cho kisindaà-ne, ngats'ì tsojmì xi yá xi 'ńó chjí xi yá ikon, kò kichá bronze, kò kichá xi 'mì hierro, kò ndajo marmol, ¹³ kò chrjoayá canela, ngats'ìi

tsojmì xi ndaà jne, chrjongó-la Nainá, ko xkiì jne xi 'mì mirra, ko chrjongó ts'e yá olivo, ko vino ko asiti. Trigo ko skoan inchrajín, ko cho ch'á, orrè, kohòyo, carreta, ko xita chi'nda nga kisatíjna.

¹⁴ Kitso-la jè naxandá:

—Ngats'ìi kjoa xi ndaà kisaseèn-la inima-lè, jyeé kitjaàxìn yije-lè. Kjoa nchiná-lè jyeé kichijà. Ko kjoa xi ndaà kòtsjachi, mì ti kiì sakò-lè nità kjé-ne.

¹⁵ Jñà xita xi otíjnaya tsojmì xi ya kjònchiná ts'e naxandá jè, kjiín kinchat'aàxìn nga tsakjón-la kjo'in. Skindáyakeè koa 'ñó 'on koma-la inima-la.

¹⁶ K'oaá kitso:

—Ima xó-ne naxandá xi 'ñó je kji, xi nikje lino chjí tsakakjá ko nikje xi sko kjoàn ko xi inì kjoàn. Yijàjno yijo-la oro, ndátòn chjí xi 'mì perla ko ndajo chjí xi 'ñó ndaà kjoàn. ¹⁷ Tajngoò tjò kachija yije kjoa nchiná xi tjín-la.

Ngats'ìi xita xi síxáko chitso, ko ngats'ìi xita xi ya chitso títsaya nga nchifi, jñà xi ya iya chitso síxá ko ngats'ìi xi síxájiìn ndáchikon, kjiín tsibìtsajna ¹⁸ k'e nga kijtseè ni'ndi-la naxandá nga títi; 'ñó kiichja, kitsò:

—Ni saá jngoò naxandá tjín xi mangásòn-kjoò koni kji naxandá jè, nga 'ñó ndaà kiyaxkon-la.

¹⁹ Ikjoàn tsibíxteèn-jno chijo sko, 'ñó kiskindáyakeè nga 'on komà-la inima-la; kitsò:

—Ima xó-ne naxandá xi 'ñó je kji; jè kjoa nchiná-la, ndaà kjònchiná-ne jñà xita xi tjín-la chitso ya jjiìn ndáchikon. Ko i'ndeji, ta jngoó tjò kachija yije kjoa nchiná-la.

²⁰ Ngats'ioò jñò xi titsajnaà ngajmiì, tsjaá t'è-là takòn. Jñò xi xita-la Nainá maà, jñò xi tsibíxáya-nò Cristo, ko jñò xi Nainá nokjoà ngajo-là, tsja t'è-là

inima-nò. Nainá jyeé kàtsjá-la kjo'in naxandá jè koií kjoa-la nga ch'o kisìko-nò.

²¹ Jngoò àkjale xi 'ñó tse nga'ñó tjín-la kiskoé jngoò ndajo xi koni kji ndajo natsí kji, kisikatjen-jiin ndáchikon, kitsò:

—Jè naxandá Babilonia, xi 'ñó je kji, k'oaá s'ín skajiin-ndá; jngoó k'aá chija nita kjé-ne, mì tì yá xi skoexkon-ne. ²² Mì tì kii kina'ya-la inchò calle-la jña música xi síkjane arpa, jña xi síkjindáya xobí, kò xi síkjane chrjo trompeta. Mì tì kii s'e-la xita xi síxá nita mé xá-ne. Tíkoa mì tì kii koxáko-ne molino ts'e ncheé. ²³ Ni'ín ts'e lámpara, mì tì kii silihiseèn-ne; mì tì kii s'e-ne s'eí nga kixan xita; koií kjoa-la kos'ín komat'in-ne nga jña xita-la xi otseya kò otijnaya tsojmì, 'ñó xita nchiná komà i isò'nde; tíkoa kiskoðnachan yije-la naxandá xi tjín isò'nde nga komà-la kis'íin kjoatj'e. ²⁴ Naxandá jè, Nainá kitsjaà-la kjo'in nga jé ts'e-né nga kinìk'en xita-la Nainá kò xita xi kiichjaya ngajo-la Nainá kò ngats'ii xita xi kinìk'en nga tíjtsa isò'nde.

19

Xita xi tsjá-la kjondaà Nainá ján ngajmii

¹ Xi jye komà iskan, ki'nchrè-la ján ngajmii 'én koni kjín jchán ma xita xi chja nga tsò:

¡Aleluya! ¡Nga tikíjna Nainá!

Nga jè ochrjekàjiin-ná kjo'in kjoa ts'e jé-ná, kò ta jè tajngoò xi tjín-la kjoajeya kò xi tse nga'ñó tjín-la.

² Nga jè Nainá, ndaà s'ín kò kixíí s'ín k'e nga tsjá-la kjo'in xita;

nga jyeé kitsjaà-la kjo'in jè naxandá je Babilonia

xi kisikits'ón-jìen isò'nde nga tsakó-la xita isò'nde
 nga kj'eí nainá kijtseèxkón
 k'oaá ngaya-la koni jngòè chjoón xi kjoa chijngui
 s'ín.

Koií jé xi komà-la nga jè kisik'en xita chi'nda-la
 Nainá xi kiichja ngajo-la.

³ Jjngòè k'a k'oa kitsò:

—¡Aleluya! ¡'Nga tikíjna Nainá! Jè ni'ndi-la jè
 naxandá nga títi, k'oaá s'ín kitjomijn nita mé
 nachrjein-ne.

⁴ Jñà xita jchínga xi kaàn ñijòn ma-ne ko xi
 ñijòn ma-ne xi títsajnakon, chincha-xkó'nchi-
 ñiat'aà-la nga kijtseèxkón Nainá xi tíjnasòn íxile
 ñánda tíhotíxoma. Kitsò:

—¡K'oas'ín kátama! 'Nga tikíjna Nainá. ¡Aleluya!

⁵ Ya íxile-la ñánda tíhotíxoma, kina'yà-la 'én xi
 kitsò:

Tji-là kjondaà Nainá ngats'ioè jñò xi chi'nda maà,
 jñò xi ixti maà ko xita jchínga,
 ngats'ioè xi tsakjoòn-chaà Nainá.

⁶ Ki'nchrè-la 'én koni tsà kjín jchán ma xita xi
 chja, koni s'ín na'yà-la nandá k'e nga one, koni s'ín
 na'yà-la k'e nga one ch'on, xi kitsò:

¡Aleluya!

¡'Nga tikíjna Nainá xi ta jè tajngoó xi 'ño tse nga'ño
 tjin-la!

Nga jyeé jè tíhotíxoma.

⁷ Tsja k'oé-lá inima-ná, sítjsja-chaá takoán, jeya
 sikíjnaá Nainá,

nga jyeé j'íi kjoa bixan-la Orrè;
 chjoón-la jyeé tíjnandaà.

⁸ Jè chjoón, jye ko'biù-la nikje lino xi 'ño chjí,
 xi 'ño tsjeè kjoàn tikoá 'ño ote nga kónakjá.

Jè nikje lino xi 'ñó chjí, jè ngayá-là kjoakixi xi s'ín xita-là Nainá.

⁹ Jè àkjale kitsò-na:

—Chjí kjoa koi: “Mé ta ndaà-là jñà xita xi xó kinokjoà-là kjoa bixan-là Orrè nga jè kòkjen-ko.”

Kitsò ìsa:

—Jñà 'én koi, nguì 'én kixi-là Nainá-né.

¹⁰ Tsohósijna xkó'nchiñia ìt'aà ndsokò jè àkjale nga mejèn-na skoexkoán. Tanga jè àkjale kitsò-na:

—Kì k'oaá 'nì; 'an, tikoáá chí'nda-là Nainá ma koni ngaji kò jñà 'ndsì xi ndaà fì tjingui-là jñà 'én kixi xi kiichja Jesús. Jè Nainá chaxkoín.

Jñà 'én kixi xi kiichja Jesús, tijnà-ne xi síkítseèn-ya-là xita xi chja ngajo-là Nainá.

Jè xi tíjnasòn-là kohòyo chroba

¹¹ Kijtseè ngajmii nga tix'á; tsatsejèn jngoò kohòyo xi chroba kji. Jè xita xi tíjnakjá-là, k'oaá s'ín yaxkon-là nga kixi síkitasòn kò kixi tíjna, koií kjoa-là nga nguì kò kjoakixi-là bíndaàjìn kò nga kjaán-kjoò. ¹² Jñà xkon, k'oaá kjoàn koni ni'ín. Ya skò, kjin corona jtobá tí'a kò jngoò 'ín-là tíj'aà xi mìkìl yá xi machiya-là kó tsòya-ne; tajngoò jè machiya-là kó tsòya-ne. ¹³ Jè nikje xi kinakjá, jní yijàjno. Jè 'ín-là, 'Èn-là Nainá 'mì. ¹⁴ Yaá tjingui-là jñà soldado ts'e ngajmii nga títsajnakjá-là kohòyo chroba; saà nikje lino chrobaá íkjá xi 'ñó chjí kò tsjeè kjoàn. ¹⁵ Jè tso'ba bitjo jngoò kichà ndojò xi 'ñó yijò kji, jè xi síki'on-ne ngats'iì naxandá. Nga jè kotìxoma-là xita naxandá. Jè yá nise sjiikjeén xi nguì kichà tájaà. Jè sobá kosinè jñà toò uva ya iya chitso nga kochrje vino xi okó kjoajti-là Nainá xi ta jè tajngoó xi 'ñó tse nga ñó tjín-là. ¹⁶ Jè nikje-là kò

chrjomí-là tjt'aa'ín xi tsò: “Xitaxá Ítjòn-là ngats'iì jñà xi xitaxá ítjòn títsajna kò jè-né xi otíxoma-là ngats'iì jñà xitá xi otíxoma.”

¹⁷ Kijtseè jngoaà àkjale xi ya síjnasòn-là ts'oi; 'ñó chja-là ngats'iì cho xi tjímajìl isén xi yijo kine. Tsò:

—Nchrobá, tixkóyaà xinguiqo mé-ne nga chjinee yijo xi Nainá tsjá-nò, ¹⁸ nga chjinee yijo-là xitaxá ítjòn, kò yijo-là xitá sko-là soldado, yijo-là xitá ts'en, yijo-là kohoyo kò yijo-là xitá xi títsakjá-là kohoyo, yijo-là ngats'iì xitá xi títsajnandejí kò xitá ch'nda kò xi ixti kò xitá jchínga.

¹⁹ Kijtseè jè cho je xi ch'o kji kò jñà xitaxá ítjòn ts'e isò'nde kò xitá soldado-là; jyeé títsajnandaà nga skaàn-kò jè xi tíjnakjá-là kohoyo chroba kò jñà soldado-là. ²⁰ Jè cho je xi ch'o kji kindobà'ñó; tíkoa kindobà'ñó jè xi 'én ndiso kùchja xi kis'iin kjojkón nga nguixkon jè cho. K'oaá s'in komà-ne nga kiskoònachan-là jñà xitá xi kiskoé chiba-là tíkoa kijtseèxkón isén xkósòn-là jè cho. Ingajò kinìkatsjoèjìl tíkòn jìlìl ni'in xi tíljnga ñánda tíl kò azufre. ²¹ Jñà xitá xi i'nga, jè kisik'en-ne jè kichá ndojò xi bitjo tso'ba jè xi tíjnakjá-là kohoyo. Ngats'iì cho xi tjímajìl isén, jñà kjòskiì-ne nga kiskine yijo-là xitá xi jye k'en.

20

Jè xi jngò jmiù nó

¹ Kijtseè jngoaá àkjale xi tíchrobájen-ne ngajmiù. 'Ya ibi ts'e nitjan jñò. Kjiya tsja jngò na'ñó kichá cadena xi 'ñó je kji. ² Jè àkjale kitsobà'ñó

jè ye jchínga xi tijè-ne xi 'mì Xita Neí kō xi Satanás. Jngoò jmiì nó tsibít'aà'ñó. ³ Kisíkatjen-s'en ya nítjan jñó; tsibíchoà'ñó-la jè xotjoa; ikjoàn tsasíjna-la sello mé-ne nga mì yá skíx'a-ne jè xotjoa nítjan. Yaá tsasíjnahiya mé-ne nga mì tí kii koma skónachan-la xita isò'nde, skanda k'e nga kjoehet'aà xi jngoò jmiì nó. Xi koma iskan tjánda'ñó ijngoò k'a-ne nga koma kojmeèndeií chiba nachrein isa.

⁴ Kijtseè íxile ts'e kjotíxoma; títsajnasòn jñà xita xi kitjoé-la kjotíxoma nga jñà koìindaàjiìn. Tíkōa kijtseè inima-la jñà xita xi kitiís'iìn, nga koi kjoa-la 'én kixi xi kitsjaà it'aà ts'e Jesús kō nga 'én-la Nainá kiichjaya. Jñà xita koi, mikiì kijtseèxkón jè cho je xi ch'o kji kō isén xkósòn-la; tíkōa mikiì kisit'aà chiba-la itjòn tjen-la kō tsja. Xita koi, ijngoò k'a tsibítsajnakon; jngoò jmiì nó tsatíxoma kō Cristo. ⁵ Jñà xita koi xi jaáya ítjòn-la. Tanga jñà mik'en xi i'nga, skanda k'ée jaáya-la nga ijchò jngoò jmiì nó. ⁶ Mé ta ndaà-la jñà xi kōkō-la nga kjoaáya ítjòn-la; xita koi, jyeé xita-la Nainá koma; jè kjoa biyaà xi ma-ne jò, nímé nga'ñó tjín-la it'aà ts'e xita koi; mì tí mé ma sùkō-ne. Tà saá nō'miì-la Nainá koma kō ts'e Cristo. Jngoò jmiì nó kotíxomako.

⁷ K'e nga kjoehet'aà xi jngoò jmiì nó, tjánda'ñó ijngoò k'a-ne jè Satanás ya ñánda tíjnahiya nítjan jñó. ⁸ Kitjondeií-ne nga skónachan-la xita naxandá xi tjín nga títsa isò'nde, jè Gog kō Magog. Koìixkóya xita mé-ne nga koìits'ia-ne kjojchán. Kjín jchán koma xita, k'oaá ngaya-la koni tsomì xi jncha indii ndáchikon. ⁹ Chinchimasòn kóhokji isò'nde; chinchandiì-la nga jngoò itjandiì ñánda títsajna xita-la

Nainá kò naxandá xi tsjakeè. Ikjoàn kisikasén ni'ín Nainá xi inchrobà-ne ngajmii. Jngoò k'a tsaká kóhotjín. ¹⁰ Jè xitá nejí xi kiskoönachan-la xitá, kinikatjen-jiiñ ya i'nde ñánda títiñga ni'ín kò azufre. Jyeé ya títsajna jè cho je xi ch'o kji kò xi kiichjaya 'én ndiso. Yaá siikjeín kjo'in kò nachrjein kò nitjen nitá kjé-ne.

Jè íxile ts'e kjoíxoma xi chroba kji

¹¹ Kijtseè jngoò íxile xi chroba kji kò 'ño je kji nga ya tíjnasòn jngoò xi tíhotíxoma. Nga nguixkòn jè xi tíjnasòn íxile, jngoò k'a kichijà nangui kò ngajmii. Nitá ñánda-ne, mì tí kiì ki'ya-la. ¹² Kijtseè mik'en xi ixti kjoàn kò xi xitá jchinga kjoàn, 'ncha kixi nguixkòn Nainá. Ikjoàn kitáx'a jña libro [ñánda tíjt'aà mé xi kis'iin nga jngó jngó xitá]; koa ijngoò libro kitáx'a ñánda tíjt'aà ts'e kjoabinachon. Jña mik'en, k'oaá s'ín kisindaàjiiñ-la koni s'ín tíjt'aà xojon ts'e libro, mé kjoa xi kis'iin. ¹³ Jè ndáchikon kitsjaà jña mik'en xi ya k'en-jiiñ. Jè kjoabiyaà kò i'nde kjo'in tíkoaá kitsjaà mik'en xi ya títsajna. K'oaá s'ín kisindaàjiiñ-la nga jngoò ijngoò xitá koni tíjín kjoa xi kis'iin. ¹⁴⁻¹⁵ Jè kjoabiyaà kò i'nde kjo'in kinikatsjoèjiiñ ñánda títi ni'ín jnga. Kò jña mik'en xi mikì tíjt'aà 'ín-la jè libro ts'e kjoabinachon, tíkoaá yaá kinikatsjoèjiiñ ñánda títi ni'ín jnga. Jè xi ma-ne jò kjoabiyaà.

21

Ngajmii xitse kò nangui xitse

¹ Kijtseè jngoáá ngajmii xitse kò nangui xitse. Jè ngajmii xi kisijna ítjòn kò nangui xi kisijna ítjòn, jyeé kichijà; tíkoaá kichijà jè ndáchikon. ² Tíkoa

kìjtseè jè naxandá tsjeè xi Jerusalén xitse 'mì, nga tìnchrobájen ngajmiù nga nguixkõn Nainá. K'oaá s'ín tijnandaà koni jngòè chjoón xi ndaà bíndaà yijo-la nga jye kixan-kõ x'in-la. ³ Ki'nchrè-la 'én xi 'ñó chja, xi ngajmiù inchrobà-ne, xi tsò:

—Chítsejèn-là Ni'ya Tsjeè-la Nainá, jyeé kòbitjojen; Nainá yaá kijnako jñà xita; xita naxandá-laá koma, nga jè sobà xi Nainá kító-la. ⁴ Jè sobà Nainá sùxijno yije ndáxkõn; mì tì kii s'e-ne kjoabiyaà; mì tì kii s'e-ne kjoaba; mì tì kii yá skindàya-ne; mì tì kii s'e-ne xi ijòjno ijòt'aà yijo-la, koi kjoa-la nga jye tsato kjoa jchínga.

⁵ Jè xi tijnasòn íxile ts'e kjotíxoma, kitsò:

—Chítsejèn-la, 'aán sùxitseya yije tsojmì xi tjin.

Ikjoàn kitsò-na:

—Chjí, xojõn tit'eii jñà 'én koi; nga ngui k'oaá s'ín tjin nga kitasòn; ngui 'én kixi-né.

⁶ Ikjoàn kitsò-na:

—Jyeé tsitasòn yije. 'An-ná xi tijná ítjoàn skanda tàts'en-la kjoa kó nga skanda fehet'aà-ne. 'An-ná xi tsibits'iaa kõ xi sikjehet'aà-na kjoa. Ngats'ii xi xínda-la, 'aán tsjaà kjõtjò-la nandá xi títitjo ya i'nde ñánda mìkii xíya nandá mé-ne koma kijnakon-ne iníma-la nita kjé-ne. ⁷ Jñà xi sùkijne, jñà skoé kjõtjò ngats'ii kjondaà koi. 'Aán kótijnakoaa nga Nainá kító-na kõ jñà, ixti-naá koma. ⁸ Tanga jñà xita xi tsakjón, jñà xi mìkii mokjeiin-la, jñà xi 'ñó ch'o s'ín, jñà xi xita sík'en, jñà xi kjoa chijngui s'ín, jñà xi xita tj'e, jñà xi xkósòn beèxkón, ngats'ii xi 'én ndiso chja, ján kixojin ñánda títì ni'ín jnga kõ azufre; jè xi ma-ne jò kjoabiyaà.

Naxandá xitse xi 'mì Jerusalén

⁹J'ìikon jngoò-na àkjale jñà xi itoò ma-ne, xi tìkoa itoò chĩsín tǐn-la, xi jncha kitseè xi itoò kjo'in xi fehet'aà-ne. Kitsò-na:

—Nchroboí, kokoò-lè jè xi koma chjoón-la Orrè.

¹⁰It'aà ts'e Inima Tsjeè-la Nainá, jè àkjale kiiko inima-na jngoò nindoò xi je kji ko 'nga kji. Tsakó-na jè naxandá xi je kji, naxandá tsjeè Jerusalén nga tínchrobájen-ne ngajmiì nga nguixkon Nainá. ¹¹Jè naxandá tsjeè Jerusalén, oteé tsejèn xi kjoa ts'e kjoajeya-la Nainá. K'oaá s'in ote kji koni ndajo chí xi 'ño ndaà kjoàn, koni ndajo xi jaspe 'mì nga ote kji koni chĩsín. ¹²Nga jngoò itjandiì, jè naxandá, chrjó ndajo tǐndiì-la xi 'ño je kji ko 'ño 'nga kji. Tejò xotjoa tǐn-la. Nga jngoò ìjngoò xotjoa, jngoò àkjale síjnajto. Tìkoa ya tǐt'aà 'ín-la nga tejò naxandá xi ya inchrobàt'aà-ne ìxti-la Israel. ¹³Ya kixi-la ñánda bitjokajin-ne ts'oi, jàn xotjoa tǐn-la, ya kixi-la ñánda kahatji-ne ts'oi, jàn xotjoa tǐn-la. Ya norte, tìkoaá jàn xotjoa tǐn-la, ya sur, tìkoaá jàn xotjoa tǐn-la. ¹⁴Jè chrjó ndajo xi tǐndiì-la naxandá, tejò chrjó ndajo xi ya tǐt'aà nga tejò 'ín-la xita xi tejò ma-ne xi it'aà ts'e Orrè kisixáya-la.

¹⁵Jè àkjale xi tíchjako-na, jngoò kicha kjinaya tsja xi nguì oro xi koni kji yá xi ma machiba-ne. Jè kisikjeén nga ma kisichiba naxandá ko xotjoa-la ko chrjó ndajo-la. ¹⁶Jè naxandá k'oaá s'in kijna nga ñijòn chrjangui tǐn-la. Koni kji ndojò, k'oaá tǐ kji tiyà-ne. Jè àkjale, k'e nga kisichiba, jò jmiì ko jò sìndo kilómetro tǐn-la. Ngásòn chiba tǐn-la nga ndojò ko nga tiyà ko nga 'nga. ¹⁷Ikjoàn kisichiba jè chrjó ndajo. Jngoò sìndo ko ichán ñijòn xkó tsja

tjín-la xi chiba-la xita xi tísíkjeén jè àkjale, [jè xi ichán nanga tjín-ne].

¹⁸ Jè chrjó ndajo xi tjíndi-la naxandá, koií tjíndaà-ne ndajo chjí xi 'mì jaspe. Kò jè naxandá, nguì oro sobà-né. K'oaá s'ín ote kji koni chítsín tsjeè. ¹⁹ Jñà tàts'en chrjó xi tjíndaà-ne nga tíchjoàndi-la naxandá, nguì ndajo chjí yijàjno xi 'ńó ndaà kjoàn. Jè xi ítjòn, jè ndajo xi 'mì jaspe; xi ma-ne jò, ndajo xi 'mì zafiro; xi ma-ne jàn, ndajo xi 'mì ágata; xi ma-ne ñjòn, ndajo xi 'mì esmeralda; ²⁰ xi ma-ne 'òn, ndajo xi 'mì ónice; xi ma-ne joòn, ndajo xi 'mì cornalina; xi ma-ne itoò, ndajo xi 'mì crisólito; xi ma-ne jiìn, ndajo xi 'mì berilo; xi ma-ne ñijaàn, ndajo xi 'mì topacio; xi ma-ne te, ndajo xi 'mì crisoprasa; xi ma-ne tejngoò, ndajo xi 'mì jacinto; xi ma-ne tejò, ndajo xi 'mì amatista. ²¹ Jñà xotjoa xi tejò ma-ne, tejò ndajo perla tjíndaà-ne. Nga jngoò ìjngoò xotjoa jngoò perla tjíndaà-ne. Ndiyá teè-la naxandá, nguì oro sobà-né koni chítsín xi ma chítsejèn-ya.

²² Ya jjiìn naxandá, nijngoò ingo kijtseè; nga jè sobà xi ma ingo-la naxandá, jè Nainá xi tjína ítjòn nga ta jè tajngoò-né xi 'ńó tse nga'ńó tjín-la kò jè Orrè. ²³ Jè naxandá, mikiì mochjeén-la jè ts'oi kò sá nga sùhiseèn-la. Nga jè sobà kjoa isén-la Nainá síhiseèn-la; kò jè Orrè ma ni'ín-la. ²⁴ Ngats'ì jñà xita naxandá ts'e isò'nde kinchima iseèn-né it'aà ts'e ni'ín-la. Kò jñà xitaxá ítjòn xi tjín isò'nde, kjiko kjoanchiná-la nga ya sùngatsja. ²⁵ Jñà xotjoa-la naxandá, mikiì síchjoàjto nga kjit'aà nachrjein; nga ya naxandá, mikiì kojñò. ²⁶ Ngats'ì naxandá kjoiko ngats'ì kjoa nchiná-la kò ngats'ì tsojmì xi

'ñó chjí-la nga ya sùngatsja. ²⁷ Ya i'nde jè ñimé kjoahas'en xi tjé kjoàn xi ch'o s'ín kò xi kjoa ndiso. Tà jñà kjoahas'en xi tjt'aa 'ín-la jè xojon-la Orrè xi ts'e kjoabinachon.

22

¹ Jè àkjale tsakó jngoò-na xajngá nandá xi kijna tsjeè tsjeè, jè nandá xi bitsajnakon-ná ñita mé naxrjein-ne. K'oas'ín tsjeè kji koni chitsín. Yaá títbitjo ñánda síjna íxile-la Nainá nga tíhotíxoma kò yaá títbitjo ñánda títjna jè Orrè. ² Ya jngoò osen ndiyá-la naxandá tífa nandá. Kò ya ngobà ngobà xajngá nandá, yaá síjna jè yá xi tsjá kjoabinachon ñita mé naxrjein-ne. Tejó k'a ojà-la toò nga jngoò nó. Jngoò jngoò k'a ojà-la toò nga ñjngoò ñjngoò sá. Jñà xka-la, k'oaá s'ín mochjeén nga maxxí-la naxandá ts'e isò'nde. ³ Mì tì mé kjoa ch'o s'e-ne xi mìkí sasén-la Nainá. Yaá sasíjna jè íxile-la Nainá kò ts'e Orrè nga kotixoma. Kò ngats'ì xita chí'nda-la, yaá sìxá-la. ⁴ Ngats'ì xi xita-la ma, skoexkon-né kó kji isén-la Nainá; kò jè 'ín-la Nainá yaá sit'aa itjòn tjen-la. ⁵ Ya i'nde jè, mì ti kojñò-ne. Jñà xita xi ya títsajna, mì tì ní'ín kochjeén-la xi sìhiseèn-la, tikoáà mì tì ts'oi kochjeén-la; nga jè sobá Nà'èn-ná xi Nainá sìhiseèn-la. Jñà xita kotixoma ñita mé naxrjein-ne.

Jyeé nchrobá machraña nga kjoí ñjngoò k'a Cristo

⁶ Jè àkjale kitsò-na:

—'Én koi, nguì k'oaá s'ín tjin nga kitasòn; nguì 'én kixi-né. Jè Nà'èn-ná xi Nainá xi síkíchiya-la jñà xita xi chja ngajo-la, koií xá kisikasén-ne àkjale-la

nga kòkò-là xi chí'nda-là ma jñà kjoà xi ta nìtoón òkoma.

⁷ —Tíná'ya-ná. 'An, kjoíi nìtoón òjngò k'a.

Mé tà ndaà-là jñà xi síkitasòn jñà 'én xi kitsjaà Nainá koni s'ín tíchjā xojon jè.

⁸ 'An-ná xi 'mì-na Juan, 'aán ki'nchrè koà kìjtseè kjoà koi. K'e nga jye ki'nchrè koà jye kìjtseè, tsohósijna-xkó'nchi-niñiat'aà-là jè àkjale xi tíhokó-na kjoà koi, nga mejèn-na skoexkoán.

⁹ Tanga jè àkjale kitsò-na:

—Kì k'oaá 'nì. Jè Nainá jchaxkoín. 'An, tìkooá chí'nda-là Nainá ma, koni ngaji, kò xità xinguii xi chjā ngajo-là Nainá, kò ngats'iì xità xi síkitasòn 'én xi tjí't'aà xojon jè.

¹⁰ K'oaá tìs'ín kitsò-na:

—Kì bìjna'ma jñà 'én xi Nainá kitsjaà xi tjí't'aà xojon jè, nga jyeé nchrobá machraña nachrjein nga kítasòn. ¹¹ Jñà xità xi mìtsà kixi títasajna nguixkxon Nainá nga ch'o s'ín, ta k'oaá s'ín kàtítasajna. Kò jñà xi tjin-là kjoakixi kò tsjeè títasajna nga nguixkxon Nainá, k'oaá tìs'ín kàtasíkitasòn xi kjoakixi kò kjoatsjeè.

¹² —Tíná'ya, 'an, kjoíi nìtoón òjngò k'a. Yaá kjoiiikooa chí'ndà-là xi tsjaà-là xità koni s'ín kis'iìn nga òjngò òjngò. ¹³ 'An-ná xi tijnā ítjoàn skanda tàts'en-là kjoà kò skanda fehet'aà-ne. 'An-ná xi tsibìts'iaa kò xi sikjehet'aà-na kjoà. 'An-ná xi tijnā ítjoàn kò xi fehet'aà-ne.

¹⁴ Mé ta ndaà-là jñà xità xi [jní-là Orrè] sítsjeè-ne níkje-là mé-ne nga tjò'nde-là nga skine toò-là yá xi tsjá kjoabinachon, tìkooa koma kjoahas'en xotjoa-là jè naxandá. ¹⁵ Tanga nditsiaán kítasajna,

ngats'iì jǎa x̄ita xi ch'o s'ín, k̄o jǎa xi x̄ita t̄j'e, k̄o jǎa xi k̄joa ch̄ingui s'ín, k̄o jǎa xi x̄ita sík'en, k̄o jǎa xi x̄kósòn beèxkòn k̄o ngats'iì xi ts̄jakeè k̄joa ndiso nga 'én ndiso ch̄ja.

16 —'An xi 'mì-na Jesús, 'aán kisikasén-nò àk̄jalē-nā nga ts̄já-nò 'én it'aà ts'e k̄joa koi, jǎo xi x̄ita naxandá-nā ma. 'An-ná jè jts'én xi itjot'aà-ne t̄jē-lā x̄itaxá it̄jòn xi ki'mì David. 'An-ná ni'ño tse xi 'ñó ote k̄ji xi bitjokàt̄ji k'e nga tajñòya.

17 Jè Inimā Ts̄jeè-lā Nainá k̄o ch̄joón-lā Orrè, tsò-né:

—Nchroboí [Nā'èn Jesús].

Jǎa xi nchi'nchré, k'oáá t̄i kàtatsò:

—Nchroboí [Nā'èn Jesús].

Jǎa xi x̄indá-lā k̄o xi mejèn-lā nandá, kàt̄janchrobá, kàt'iì k̄jot̄jò nandá xi ts̄já k̄joabinachon.

18 'An, k'oáá xan-nò, ngats'ioò xi na'yà-là jǎa 'én xi kitsjaà Nainá xi t̄jít'aà xojon jè: Tsà yá xi k̄iit'aàsòn k̄joa xi t̄jít'aà xojon jè, Nainá k'oáá t̄is'ín ts̄jásòn-lā k̄jō'in koni s'ín t̄jít'aà xojon jè. 19 Tsà yá xi k̄joááxìn jngoò-lā 'én xi kitsjaà Nainá xi t̄jít'aà xojon jè, Nainá, t̄ikoáá k̄joááxìn k̄jondaà xi t̄jí'nde-lā nga sk̄ine toò-lā yá xi ts̄já k̄joabinachon k̄o mìk̄i ts̄já'nde-lā nga yá k̄itsajna naxandá ts̄jeè-lā Nainá koni s'ín t̄jít'aà xojon jè.

20 Jè xi bénoj̄mí k̄joa koi, k'oáá tsò:

—Jon, k̄joji n̄itoón ìjngoò k'a.

K'oáá s'ín kàtama. ¡Nchroboí Nā'èn Jesús!

21 K̄jondaà-lā Nā'èn-ná Jesucristo kàt̄ijnako-nó ngats'ioò. K'oáá s'ín kàtama.

'Én-lá Nainá xi kjoa ts'e Jesucristo
New Testament in Mazatec, San Jerónimo Tecóatl
Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Jul 2024 from source files
dated 29 Jan 2022

9f778253-d34e-5037-af35-7bca16479aa0